

館閣漫錄

智洪武 永樂 洪熙

宣德 正統





館閣漫錄卷之一

洪武

永樂

不二齋校梓

洪武三十五年七月初一日其日壬午

成祖即位

以後翰林遷轉并入閣事蹟

七月丙戌陞翰林院侍講王景為本院學士擢吳府

審理副楊士奇為編修 戊子擢儒士曾日章為翰

林院侍讀陞國子監助教鄒緝為侍講改給事中金

幼孜王洪及桐城縣知縣胡儼俱為檢討 己亥陞

翰林院待詔解縉為本院侍讀修撰胡靖為侍講編

修吳溥楊子榮為修撰檢討鄭子義為編修擢太平



縣儒學訓導蕭引高爲檢討應天府儒學訓導王汝  
王蕪湖縣儒學訓導張伯頴爲五經博士特改子榮  
名榮

八月壬子朔 戊午陞中書舍人黃淮爲翰林院修  
撰 丙寅 上於宮中得建文時群臣所上封事千  
餘通披覽一二有干犯者命翰林侍讀解縉等徧閱  
關係軍馬錢糧數目則留餘有干犯者悉焚之既而  
從容問縉等曰爾等宜皆有之衆稽首未對修撰李  
貫進曰臣實無之 上曰爾以獨無爲賢耶食其祿  
則思任其事當 國家危急之際在近侍獨無一言

可乎朕非惡夫盡心於建文者但惡導誘建文壞  
祖法亂政經耳爾等前日事彼則忠於彼今日事朕  
當忠於朕不必曲自遮蔽也

九月己丑朔 癸巳賜翰林侍讀解縉等七員金織  
羅衣各一襲

十一月庚辰朔 己丑陞翰林院侍讀解縉爲本院  
侍讀學士侍講胡靖編修黃淮檢討胡儼皆侍讀修  
撰楊榮編修楊士奇檢討金幼孜皆侍讀

永樂元年四月丁未朔 乙卯擢袁州府儒學訓導  
廖敬先爲檢討 庚申禮部以 萬壽聖節宴百官



食膳沙錄 卷之二  
預定其位次進呈 上命駙馬儀賓及隨侍各王來朝官宴于三公府四品以上文武官諸學士及在京僧道官大龍興寺住持侍宴奉天殿在京各衙門堂上六品以上官近侍官修史官宴于中左門在外進表官四夷朝貢土官宴于中右門餘文武官宴于丹墀內

六月丁未朔 辛酉監修國史太子太師曹國公李景隆等總裁官翰林侍讀學士解縉等上表進

太祖高皇帝實錄 丙寅以實錄成陞纂修官吏部郎中徐旭為國子祭酒太常博士錢仲益知縣楊顥

梁潛王褒為翰林修撰國子博士王達給事中朱紘為編修行人蔣驥為檢討國子博士金玉鉉為翰林五經博士晉府伴讀蘇伯厚為翰林侍書教諭鮮榮劉宗平為待詔教授張顯為國子學正訓導傅貴羅師程為國子學錄知府劉辰為江西布政司左叅政禮部郎中胡遠為左叅議知縣趙季通例應陞而以疾乞教職授國子博士僉事葉砥改吏部考功郎中知縣唐廣雲改監察御史楚府教授吳勤改開封府學教授陞騰寫官主事陸顥為禮部員外郎端季思為兵部員外郎擢監生鍾子勤陳彛訓劉謙沈文為



中書舍人梁逢吉葉蕃沈紹先華嵩喬岳衛浩鄭中  
余從善陳俊良陳實為監察御史生員金寔為翰林  
典籍汪琦等十人為知縣

七月丙子朔 上諭侍讀學士解縉等曰天下古今  
事物散載諸書篇帙浩穰不易檢閱朕欲悉采各書  
所載事物類聚之統之以韻庶幾考索之便如探囊  
取物爾嘗觀韻府回奚二書事雖有統而采摘不廣  
紀載太畧爾等其如朕意凡書契以來經史子集百  
家之書至于天文地志陰陽歷卜僧道技藝之言備  
輯為一書毋厭浩繁

八月應天府奏請考鄉試 上命翰林院侍讀胡廣  
編修王達為考試官

十二月甲戌朔翰林院侍讀學士解縉等奉勅修古  
今列女傳成 上親製序文賜縉及侍讀黃淮胡儼  
侍講楊榮金幼孜楊士奇檢討王洪蔣驥典籍沈度  
文綺衣各一襲鈔有差 乙未擢鄉貢舉人王偁為  
翰林院檢討既命下 上問左右曰翰林院檢討之  
下何官對曰博士典籍侍書待詔又曰皆已除人未  
對曰已除又問其賢視偁何若對曰偁初除未知其  
為人如舊博士中皆老成文學士 上歎曰古所謂



館陶沙錄 卷之二  
用人如積薪此類是矣國家用人以賢以勞偁之賢  
既未可知勞亦未有而今賢有勞者位其下何以服  
士心命吏部凡翰林自博士以下皆陞職與偁同遂  
陞博士張伯頴王汝玉典籍沈度潘畿侍書蘇伯厚  
待詔王延齡劉宗解榮皆爲檢討

永樂二年正月癸卯朔 庚申擢寧國府學訓導陳  
仲完爲編修 戊辰禮部會試天下舉人奏請考試  
官 上命侍讀學士解縉侍讀黃淮爲考試官賜宴  
于本部

三月壬寅朔 上御奉天殿試禮部選中舉人楊相

等四百七十二人乙巳 上御奉天殿閱舉人對策

擢曾榮爲第一 己酉吏部奏授進士曾榮等官命

第一甲曾榮爲翰林院修撰周述周孟簡俱爲編修

仍命於第二甲擇文學優等楊相等五十人及善書

湯流等十人俱爲翰林院庶吉士俾仍進學 甲寅

賜曾榮周述周孟簡羅衣各一襲 庚申陞翰林院

編修王達爲侍讀學士 命工部建進士題名碑於

國子監命翰林院侍讀學士王達撰記

四月辛未朔簡東宮官屬命淇國公丘福兼太子太  
師成國公朱能兼太子太傅吏部尚書蹇義兼詹事



陞工部右侍郎金忠爲兵部尚書兼詹事兵部右侍郎墨麟工部左侍郎趙毅俱兼少詹事陞吏科都給事中朱原貞刑科左給事中陸中善俱爲詹事府丞命禮部尚書李至剛兼左春坊大學士陞翰林院侍讀學士解縉爲本院學士兼右春坊大學士翰林院侍讀黃淮爲左庶子胡廣爲右庶子胡儼左諭德皆仍兼侍讀翰林院侍讀楊榮右諭德仍兼侍講以翰林院侍講楊士奇兼左春坊左中允改北京刑部主事尹昌隆爲左中允陞翰林院修撰李貫右春坊右中允仍兼修撰命吏部左侍郎溫思恭兼左春坊左

贊善陞翰林院編修陳仲完爲左贊善仍兼編修檢討王汝玉爲右春坊右贊善仍兼檢討陞國子監博士徐善述監察御史王子沂俱爲左春坊左中允國子助教晁鑄刑科給事中王文貴俱爲右春坊右中允刑部司務楊正爲左春坊左中允國子博士楊斌右春坊右中允清紀郎教授程禧教諭黃貫俱左春坊司諫教諭張祥梁良俱右春坊司諫陞翰林院編修楊溥中書舍人姚友直俱爲司經局洗馬溥仍兼編修戶科給事中吳牧兼司經局校書吏科給事中梁質兼司經局正字陞教諭劉真爲校書訓導守王



雅爲正字 丁丑陞湖廣寶慶府知府儀智爲通政  
司右通政兼右春坊右中允 甲申文華寶鑑成先  
是命侍臣輯自古以來嘉言善行有益於太子者爲  
書以授太子至是書成名文華寶鑑 上御奉天門  
召 皇太子授之曰修己治人之要具於此書昔堯  
舜相傳惟曰允執厥中帝王之道貴乎知要知要便  
足爲治爾其勉之皇太子拜受而退 上顧翰林院  
學士兼右春坊大學士解縉等曰 皇考訓戒太子  
嘗採經傳格言爲書名儲君昭鑒錄朕此書稍充廣  
之蓋以 皇考聖謨大訓以爲子孫萬世帝王之法

誠能守此足爲賢君昔秦始皇教太子以法律晉元  
帝授太子以韓非書帝皇之道廢而不講此所以亂  
亡朕此書皆大經大法卿等宜輔東宮從容閒暇亦  
當以此爲說庶幾成其德業他日不失爲守成令主  
五月辛丑朔禮科言國子監祭酒徐旭坐書奏不謹  
當降 上問吏部尚書蹇義旭爲人何如對曰有文  
持守而於人寡合 上曰持守之人固當寡合蓋其  
中有所主而不能脂韋依阿於外况兼有文學宜寘  
之近侍遂命爲翰林院修撰 戊申陞通政司右通  
政兼右春坊右中允儀智爲湖廣右布政使



九月己亥朔 庚申 上御右順門召翰林院學士  
鮮縉侍讀黃淮胡廣胡儼侍講楊榮楊士奇金幼孜  
諭之曰朕即位以來爾七人朝夕相與共事鮮離左  
右朕嘉爾等恭慎不懈故在宮中亦屢言之然恒情  
保初易保終難朕固常存於心爾等亦宜謹終如始  
庶幾君臣保全之美縉等叩首言陛下不以臣等淺  
陋過垂信任敢不勉勵圖報 上喜皆賜五品公服  
又曰皇后數言欲召見爾七人命婦其令即赴柔儀  
殿見是日縉等之妻入見 中宮訓勞備至皆賜五  
品冠服及鈔幣表裏 丁卯陞左春坊左諭德兼侍

讀胡儼為祭酒

十一月己亥朔 壬子擢富平縣丞陸具瞻為翰林  
院編修具瞻嘗事 上於藩邸克効恭勤云 丁巳  
翰林院學士兼右春坊大學士鮮縉等進所纂錄韻  
書賜名文獻大成賜縉等百四十人鈔有差錫宴于  
禮部既而 上覽所進書尚多未備遂命重修而勅  
太子少師姚廣孝刑部侍郎劉季篔及縉總之命翰  
林學士王景侍讀學士王達國子祭酒胡儼司經局  
洗馬楊溥儒學陳濟為總裁翰林院侍講鄒緝修撰  
王褒梁潛吳溥李貫楊顥曾棨編修朱絃檢討王洪



食陽沙金  
蔣驥潘畿王爾蘇伯厚張伯頴典籍梁用行庶吉士  
楊相左春坊左中允尹昌隆宗人府經歷高得賜吏  
部郎中葉砥山東按察僉事晏璧爲副總裁命禮部  
簡中外官及四方宿學老儒有文學者充纂修簡國  
子監及在外郡縣學能書生員繕寫開館於文淵閣  
命光祿寺給朝暮膳

十二月戊辰朔甲午立春 賜六部尚書侍郎金織  
文綺衣各一襲特賜翰林院學士解縉侍讀黃淮胡  
廣侍講楊榮楊士奇金幼孜衣與尚書同縉等入謝  
上曰朕與卿等非偏厚代言之司機密所屬况卿六

人旦夕在朕左右勤勞助益不在尚書下故於賜賚  
必求稱其事功何拘品級又曰朕 皇考初制翰林  
長官品級與尚書同卿等但盡心職任孔子云君使  
臣以禮臣事君以忠君臣各盡其道耳縉等稽首而  
退

永樂三年正月戊戌朔 壬子先是 上命翰林院  
學士兼右春坊大學士解縉等於新進士中選才質  
英敏者俾就文淵閣進學至是縉等選修撰曾棨編  
修周述周孟簡庶吉士楊相劉子欽彭汝器王英王  
直余鼎章敞王訓柴廣敬王道熊直陳敬宗沈升洪



順章朴余學夔羅汝敬盧翰湯流李時勉段民倪維  
哲袁添祿吾紳楊勉二十八人入見 上諭勉之曰  
人須立志立則功就天下古今之人未有無志而能  
建功成事者汝等簡拔於千百人中爲進士又簡拔  
於進士中至此固皆今之英俊然當立心遠大不可  
安於小成爲學必造道德之微必具體用之全爲文  
必並驅班馬韓歐之間如此立心日進不已未有不  
成者古人之學之至豈皆天成亦積功所至也汝等  
勉之朕不任爾以事文淵閣古今載籍所萃爾各食  
其祿日就閣中恣爾玩索務實得於已庶國家將來

皆得爾用不可自怠以孤朕期待之意時進士周忱  
自陳年少願進學 上喜曰有志之士也命增忱爲  
二十九人遂命司禮監月給筆墨紙光祿朝暮給膳  
禮部月給膏燭鈔人三錠工部擇近地宅居之 丙  
辰國子監祭酒胡儼請申明洪武中所定學規從之  
上諭儼曰此其條約耳爲師範者當務正己以先之  
講學漸磨以養其心以淑其身此爲切要

二月丁卯朔 壬午陞翰林院編修陸具瞻爲趙府  
左長史以具瞻嘗授學趙王云

八月應天府鄉試奏請考官 上命翰林院學士王



景侍讀學士王達考試賜宴于本府

永樂四年二月壬戌朔 巳巳禮部以會試天下舉

人奏請考試官 上命翰林院侍讀學士王達司經

局洗馬兼翰林院編修楊溥考試 賜宴于禮部

壬申 上以太祖高皇帝御製嘉禾詩勒石裝成

軸 賜諸王及尚書侍郎內閣學士侍讀侍講及國

子監祭酒司業

三月辛卯朔 上幸太學賜翰林院學士兼右春坊

大學士解縉等六員二品金織羅衣各一襲 乙巳

上御奉天殿閱舉人對策擢林環第一 癸丑擢第

一甲進士林環為修撰陳全劉素為編修選第二甲

第三甲進士文翰優者江殷胡榮先孫迪張叔豫李

岳潤陳孟絮張文選鄭復言曾春齡蕭福曹昌盧永

黃猷十三人改庶吉士翰林院讀書

七月戊子朔 辛丑 賜左春坊左庶子兼侍讀黃

淮等五員二品金織紗衣各一襲

閏七月戊午朔 巳巳召北京儒士武周文至勞諭

甚至特命為翰林侍講學士賜冠帶金織羅衣一襲

明日入謝以其老令致仕 上語翰林侍讀胡廣等

曰朕守藩時聞暇喜觀易時王府官亦有三二人知



易然皆不若周文切實但所言亦有拘滯不流動處  
蓋易道妙在變通不失其正耳古人隨時從道之說  
最得要領亦在虛心以玩之耳又曰爲學不可不知  
易只內君子外小人一語人君用之功效不少 乙  
亥 上御奉天殿翰林侍講學士致仕武周文陛辭  
命留之賜坐與語良久 上曰卿篤學惇德宜在朕  
左右然春秋高矣不欲煩勞宜歸家享子孫奉養以  
終天年周文起頓首謝又命賜酒饌楮幣給驛傳送  
至家 上顧謂翰林侍讀胡廣曰周文亦操履端方  
廣等對曰 陛下待儒臣進退之際恩禮俱至儒道

光榮多矣 上咲曰朕用儒道治天下安得不禮儒  
者致遠必重良馬粒食必重良農亦各資其用耳

九月丁巳朔 丁卯賜翰林侍讀黃淮等五員金織  
羅衣各一襲 壬午 上聞翰林院讀書庶吉士王  
訓湯流柴廣敬相繼病卒歎息謂侍臣曰朕深有望  
文學之士復前古之盛故簡拔此二十八人者加厚  
作養之庶天下才俊有聞而興起者曾不幾時連失  
三人何其成之難而喪之易也咨嘆久之

永樂五年三月乙卯朔 丙子吏部言詹事府六品  
以上正佐官三年考滿宜如太常寺等衙門官例不



考俟九年奏請黜陟其主簿錄事舍人宜如六部等衙門屬官例考覈從之 癸未賜文武百官西洋及

高麗布有差特命翰林院侍讀黃淮胡廣侍講楊榮楊士奇金幼孜賜同尚書

四月乙酉朔 辛卯 皇長孫出閣就學 癸巳賜

翰林院侍讀黃淮五員金織雲鶴紗衣各一襲 甲

午召前禮部儀制司郎中兼右春坊右贊善李繼昂

至復以為右贊善命侍 皇長孫說書繼昂以病免

歸歲餘至是 上念藩邸舊人復召用之

六月乙未翰林院侍讀學士王達卒達無錫人自縣

學訓導以薦陞國子助教 上即位用姚廣孝言陞

編修再陞侍讀學士

十一月辛亥朔陞右春坊右庶子兼翰林院侍讀胡

廣為翰林院學士兼左春坊大學士左春坊左庶子

兼翰林院侍讀黃淮為右春坊大學士仍兼侍讀左

春坊左諭德兼翰林院侍講楊榮為右春坊右庶子

翰林院侍講兼左春坊左中允楊士奇為左春坊左

諭德翰林院侍講金幼孜為右春坊右諭德榮士奇

幼孜皆仍兼侍講翰林院侍講鄒緝兼左春坊左中

允修撰曾祭林環皆陞侍講修撰梁潛兼右春坊右



贊善陸翰林院檢討沈度庶吉士彭汝器王直余鼎  
王英羅汝敬爲修撰仍命吏部臣曰廣等侍朕日久  
繼今考滿勿改外任 乙丑太子少師姚廣孝等進  
重修文獻大成書凡二萬二千九百三十七卷一萬  
一千九十五本更名永樂大典 上親製序以冠之  
永樂六年正月庚戌朔 丁丑賜翰林院學士胡廣  
等五員各綵幣二表裏白金十兩鈔五百貫  
六月戊寅朔 庚寅右春坊右庶子無翰林院侍講  
楊榮丁父憂歸賜鈔一千貫

七月丁未朔 癸酉翰林院學士王景卒景字景彰

處州松陽縣人洪武初歷教諭知州升山西布政司  
右叅政坐事謫雲南建文中以知縣召修 高廟實  
錄丁母憂去服闋吏部尚書張統前任雲南雅知之  
奏陞翰林院侍講 上即位陞學士時建文君未葬  
上詢景葬禮景對以天子禮 上然其言景博學以  
古文自擅亦善筆札然不謹細故與時多忤云

八月丙子朔議定明春巡狩北京內帶去翰林院內  
閣官三員侍講修撰典籍等官六員 癸未應天府  
鄉試奏請考試官 上命翰林院修撰李貫檢討王  
洪考試賜宴于本府



九月丙午朔 壬戌陞翰林院修撰吳溥爲國子監司業 癸亥陞中書舍人芮善爲司經局洗馬

十月壬寅起復右春坊右庶子兼侍講楊榮

十一月乙巳朔 甲寅 命太子太師淇國公丘福

吏部尚書兼詹事蹇義兵部尚書兼詹事金忠翰林院學士左春坊大學士胡廣右春坊大學士兼翰林院侍讀黃淮右春坊右庶子兼翰林院侍講楊榮左春坊左諭德兼侍講楊士奇右春坊右諭德兼侍講金幼孜司經局洗馬姚友直輔導 皇長孫 丙辰陞江西道監察御史于敬李賢爲左春坊左中允宛

平縣丞梁敏爲左贊善山東道監察御史劉子春河南道監察御史韓守善爲右春坊右中允

永樂七年正月甲辰朔 癸亥命翰林院學士胡廣侍講楊榮金幼孜扈從賜錦衣狐帽狐裘鞍馬巡狩至北京 交趾布政司左布政使張顯宗卒顯宗字明遠汀州寧化人洪武中進士及第授翰林院編修陞太常寺丞再陞國子監祭酒建文中陞工部侍郎坐事免交趾平復起爲左布政使

二月甲戌朔 戊寅 上諭右春坊大學士黃淮左諭德楊士奇曰朕命爾等輔 東宮監國東宮天性



仁厚識見端正嘗一日侍側朕問講官今日說何書  
對曰君子小人和同章因問何以君子難進易退小  
人則易進難退對曰小人逞才無耻君子守道而無  
欲又問何以小人之勢常勝對曰此係上之好惡如  
明主在上必君子勝矣又問明主在上都不用小人  
乎曰小人果有才不可棄者須常警飭之不使有過  
可也朕時甚喜其問學有進爾等其盡心輔之 庚  
辰禮部以會試天下舉人啓請考試官 皇太子命  
翰林院侍講鄒緝左春坊左司直郎徐善述考試賜  
宴于禮部 庚寅前右春坊右贊善無檢討王汝玉

坐修禮書忝制度當謫戍邊 皇太子重其文學且

憫其老宥之以為翰林院典籍

閏四月癸卯朔 戊辰 勅吏部尚書無詹事蹇義

兵部尚書無詹事金忠右春坊大學士無侍讀黃淮

左春坊左諭德無侍讀楊士奇曰朕命皇太子監國

其所裁決庶務須令六科逐月類奏

五月壬申朔 庚寅 皇太子擢山東道監察御史

周幹為左春坊左中允幹嘗巡按北京寬大有體見

知 皇太子故擢寘左右

六月壬寅朔 巳酉 賜書皇太子令諭右春坊大



學士兼侍讀黃淮左諭德兼侍講楊士奇以太祖高  
 皇帝御製文集及洪武實錄點檢完備封識付老成  
 內官一人同錦衣衛指揮王真及翰林院官鄒緝梁  
 潛李貫王洪送赴北京仍令淮士奇在朝內慎舉謹  
 厚篤實文學可稱者數人偕來 甲寅 皇太子命  
 起復司經局洗馬兼編修楊溥 丁卯 上以御史  
 歐陽兼文學稍優改編修

七月辛未朔 戊子 皇太子擢庶吉士王淪為左  
 司直郎 庚寅 皇太子擢孔諤為左春坊左中允  
 諤宣聖五十七代孫時以鄉貢舉人會試中副榜第

一當授教官以宣聖後召見文華遂擢之

十月己亥朔 辛酉 皇太子陞翰林院典籍金寔  
 為左司直郎

十二月戊戌朔 甲寅 皇太子陞浙江道監察御  
 史陳灝為左春坊左中允 福建道監察御史徐敬為  
 右春坊右中允

八年二月戊戌朔 癸卯命國子監祭酒胡儼兼翰  
 林院侍講

三月丁卯朔 乙酉 皇太子擢茂名縣知縣董子  
 莊為北京國子司業時子莊以通經名召修永樂大



典于翰林遂簡用之

五月丁卯朔 壬午 皇太子改北京刑部主事趙遜為左司直郎

七月丙寅朔 戊辰遣右春坊右庶子兼侍講楊榮賞書諭 皇太子以七月十七日抵北京

八月乙未朔 己未 賜扈從北征文職官鈔及綵幣表裏有差特命翰林院學士胡廣侍講楊榮金幼孜賜同尚書

十二月癸巳朔 癸丑 皇太子改左司直郎徐善述為左贊善

永樂九年二月壬辰朔 癸巳陞左春坊左中允李賢為雲南按察僉事

三月辛酉朔 甲子 上廷試舉人陳璉等擢蕭時中為一甲第一 甲戌擢一甲進士蕭時中為修撰

苗衷黃暘俱為編修第二甲第三甲進士楊慈劉永清陳璉錢習禮黃壽生陳用俱為翰林庶吉士鍾英

張習張式馬信邵聰初自國子監生選入翰林習譯書至是中進士亦改庶吉士

六月庚寅朔 壬子右春坊右庶子兼翰林院侍講

楊榮奔喪還至京 戊午交趾布政司右叅議解縉



有罪徵下獄先爲翰林學士兼右春坊大學士甚見  
寵任坐廷試讀卷不公出爲廣西布政司右叅議會  
有言縉嘗洩建儲時密議者遂改交趾命專督化州  
魏饒時翰林檢討王偁有罪亦謫交趾二人遂共趨  
廣東娛嬉山水忘返縉又上言請用數萬人鑿贛江  
以便往來 上曰爲臣受事則引而避去乃欲勞民  
如此併偁皆下獄後數歲皆瘦死縉文學書札獨步  
當時其爲人曠易無城府喜薦引士然少慎擇且所  
行多任情忽畧故及於罪偁爲文獨爲縉所喜而傲  
誕不檢士論黜之初縉之下獄也獄吏拷治索所與

同謀縉不勝箠楚書大理寺丞湯宗宗人府經歷高  
得暘禮部郎中李至剛右春坊右中允兼修撰李貫  
贊善兼編修王汝玉編修朱紘檢討蔣驥潘畿蕭引  
高等塞責皆下獄後得暘貫汝玉紘引高相繼死獄  
中貫甲科進士爲翰林修撰兼中允負清介之操其  
死也士類惜之

八月庚寅朔 乙未應天府請鄉試考官 上命翰

林院學士兼左春坊大學士胡廣右春坊右庶子兼  
翰林院侍講楊榮考試賜宴于本府

十月己丑朔 乙巳命重修 太祖高皇帝實錄



上初即位命曹國公李景隆等監修而景隆等心術不正又成於急促未極精詳 上巡幸至北京之初命翰林院學士胡廣等重修至是命太子少保姚廣孝戶部尚書夏原吉爲監修官翰林學士無左春坊大學士胡廣國子祭酒無侍講胡儼右春坊大學士無侍讀黃淮右庶子無侍讀楊榮爲總裁官右諭德無侍講楊士奇金幼孜爲纂修官 戊申陞翰林院檢討王洪爲修撰

永樂十年二月丙辰朔給授吏部尚書無詹事蹇義戶部尚書夏原吉禮部尚書呂震兵部尚書無詹事

金忠兵部尚書方賓翰林院學士無左春坊大學士胡廣右春坊大學士無翰林院侍讀黃淮右春坊右庶子無翰林院侍講楊榮左春坊左諭德無翰林院侍講楊士奇右春坊右諭德無翰林院侍講金幼孜誥命并封贈其祖父母父母及妻如制蓋特恩云 辛酉禮部會試天下舉人奏請考試官 上命翰林院侍講楊士奇金幼孜考試賜宴于禮部 戊辰命禮部尚書諭考官楊士奇金幼孜日數科取士頗多不免玉石雜進今取毋過百人其務精擇收散材累百不若得良材一株也 取林誌等一百人



三月乙酉朔 戊子 上御奉天殿閱舉人對策擢馬鐸為第一 壬辰命一甲進士馬鐸為翰林院修撰林志王銓為編修進士內原習譯書蔣禮趙勗徐俊何賢潘勤黃裳羅興楊榮張觀王觀馬馴王璜劉濬胡讓邵暹米顛方復為庶吉士仍隸翰林院 巳酉陞廣東道監察御史裴璉為右春坊右中允許勝為左春坊左司直郎 癸丑賜翰林院學士兼左春坊大學士胡廣等五員二品織金紗衣各一襲

四月乙卯朔 賜在京文武百官夏布有差學士胡廣等五員賜同尚書

五月甲申朔 壬子陞中書舍人王遂為左司直郎

七月甲申朔 丙戌賜在京文武衙門堂上官兜羅錦被有差翰林院學士胡廣等五員賜同尚書 甲辰擢吏部郎中鄒濟為左春坊左庶子濟寧州學正高壽為左春坊左中允中書舍人吳均北京國子監助教黃琮岳州府教授趙文為右春坊右中允改左中允孔諤司諫朱璉為監察御史左司直郎許勝右中允劉子春裴璉為刑部主事

八月癸丑朔 庚申陞國子監助教貝泰為北京國子監司業



十一月壬午朔命右春坊右庶子兼侍講楊榮往陝西同豐城侯李彬詣甘肅經畧

永樂十二年八月辛丑朔 丙午北京行部鄉試奏請考官 上命翰林院侍講曾榮翰林院侍講兼左春坊左中允鄒緝考試賜宴于本部 丁未應天府鄉試請考試官 皇太子命司經局洗馬兼編修楊溥編修周述考試賜宴于本府

十一月庚子朔 甲寅 上諭行在翰林院學士胡廣侍講楊榮金幼孜曰五經四書皆聖賢精義要道其傳註之外諸儒議論有發明餘蘊者爾等采其切

當之言增附于下其周程張朱諸君子性理之言如太極通書西銘正蒙之類皆六經之羽翼然各自為書未有統會爾等亦別類聚成編二書務極精備庶幾以垂後世命廣等總其事

永樂十三年二月己巳朔 甲戌行在禮部會試天下舉人奏請考試官 上命翰林院修撰梁潛王洪考試賜宴于禮部

三月己亥朔 壬寅 上御奉天殿閱舉人對策擢陳循為第一 丁巳命第一甲進士陳循為修撰李貞陳景著為編修仍命同纂修性理大全等書第二



甲第三甲進士洪英王翺林文結宋魁陳鏞曾弘林  
道節胡觀章文昭嚴珊金關王英鄭珞袁璞周崇厚  
習侃鄭雍言牟倫呂崇張益黃仲芳廖謨宋琰朱杲  
范琮黃獻陳文璧高毅張堅沈賜及原習譯書王懋  
姚昇胡清方勉林超曹義龔英時永彭麟應陳坤奇  
李芳葉穎王世華吳紹生丁毅石玉黎民張遜萬完  
周貴連智王諭樊敷王麟戴觀許彬徐景安石慶鄭  
猷李冠祿周安謝暉為翰林院庶吉士

九月乙未朔 戊申擢行在翰林院庶吉士陳用劉  
永清陳遜黃壽生余學夔錢習禮為本院檢討此後性理

大全成名姓  
在大全不書

永樂十四年三月癸巳朔 辛亥陞翰林院修撰兼  
右贊善梁潛為本院侍讀仍兼贊善編修陳全為侍  
講

四月癸亥朔 乙亥命翰林院學士無左春坊大學  
士胡廣為文淵閣大學士右庶子兼侍講楊榮右諭  
德兼侍講金幼孜俱為翰林院學士三人俱仍兼春  
坊原職

八月庚申朔 壬申陞翰林院修撰王英王洪俱為  
本院侍講 癸酉陞檢討張伯穎為本院修撰



十二月戊午朔 壬午歷代名臣奏議書成 上諭  
皇太子命翰林院學士黃淮楊士奇集 甲申陞翰  
林院修撰沈度為本院侍講學士中書舍人沈粲為  
修撰粲度之弟也

永樂十五年二月戊午朔 乙亥陞左諭德兼侍講  
楊士奇為翰林院學士仍兼諭德

五月丙戌朔賜文淵閣大學士胡廣學士楊榮金紉  
致金紗衣

七月甲寅朔 癸未賜大學士胡廣學士楊榮金紉  
致二品金織龍衣等物

八月甲申朔 己丑北京行部鄉試請考官 上命  
行在翰林院侍講左中允鄒緝侍講王洪考試賜宴  
于本部 庚寅改命行在翰林院侍講王英為鄉試  
考官出侍講王洪為禮部主事洪杭州人由進士任  
行人陞給事中以文學擢檢討陞修撰復陞侍講洪  
初有操守恒自負矜已傲物醉輒出忿語斥同列以  
不得為學士中懷怏怏嘗䟽誣學士胡廣其父子棋  
為延平府知府以罪死廣不當於實錄中隱其罪  
上察知子祺卒於官遂不直洪 辛卯應天府鄉試  
啓請考官 皇太子命侍讀兼右贊善梁潛侍講陳



全考試

九月癸丑朔 乙丑賜文淵閣大學士胡廣翰林院  
學士楊榮金幼孜白金各五十兩綵幣四表裏綿布  
各十疋 庚午陞翰林院修撰沈粲為本院侍讀  
十月癸未朔 戊申陞翰林院典籍鄭叔美為本院  
檢討

永樂十六年二月壬午朔 丁亥行在禮部會試天  
下舉人請考官 上命行在翰林侍讀學士曾榮侍  
講王英考試

三月辛亥朔 甲寅 上御奉天殿閱舉人對策擢

李騏為第一騏初名馬特賜今名丙寅擢第一甲進  
士李騏為翰林院修撰劉江鄧珎俱為編修其第二  
甲第三甲周叙董璘楊璜褚思敬尹鳳岐陳詢徐律  
習嘉言王賓胡文善周懋昭王暹雷遂莫珪孔友諒  
秦初等俱為翰林院庶吉士

五月庚戌朔 辛亥賜重修實錄監修官夏原吉鈔  
二百錠綵幣三表裏紗衣一襲總裁官文淵閣大學  
士兼左春坊大學士胡廣翰林院學士兼左庶子楊  
榮國子監祭酒兼侍講胡儼人鈔百六十錠綵幣二  
表裏紗衣一襲纂修官翰林院學士兼右諭德金幼



食附錄卷之二  
致賞胡廣等侍讀學士曾榮侍讀鄒緝王英修撰余  
鼎羅汝敬主事李時勉陳敬宗人鈔百錠 甲寅賜  
翰林院學士楊榮金幼孜二品金織羅衣一襲 丁  
巳文淵閣大學士兼左春坊大學士胡廣卒廣字光  
大吉水人建文庚辰進士第一賜名靖永樂初勅復  
舊名贈尚書謚文穆

六月庚辰朔 乙酉纂修天下郡縣志書命行在戶  
部尚書夏原吉翰林院學士楊榮金幼孜總之

七月己酉朔 甲戌翰林院侍讀兼右贊善梁潛以  
輔導有闕下獄死

永樂十七年十月壬申朔 庚寅命故文淵閣大學  
士胡廣之子種為翰林院檢討俾進學翰林院蓋追  
念廣之勞也

永樂十八年正月庚子朔 丙子 上命行在學士  
楊榮金幼孜並為文淵閣大學士兼翰林院學士賜  
宴于禮部

八月丁酉朔 壬寅北京行部鄉試請考官 上命  
左春坊左中允兼行在翰林院侍講鄒緝王英考試  
賜宴于本部 是日應天府鄉試啓請考官 皇太  
子命修撰張伯頴左贊善兼編修陳仲完考試賜宴



于本府

九月丙寅朔 丁卯擢揚州府學教授蘭從善青州

府學教授林長懋寶雞縣學教諭徐永達俱為翰林院編修

十一月乙丑朔 癸巳賜文武群臣金織紵絲表裏

各一襲特命文淵閣大學士兼翰林院學士楊榮金幼孜賜同尚書

十二月乙未朔 甲辰陞修撰羅汝敬為侍講

永樂十九年正月甲子朔 乙丑陞中書舍人朱孔賜為翰林院編修 丁卯命翰林院學士兼左春坊

左諭德楊士奇為右春坊大學士

二月甲午朔 己亥禮部會試天下舉人奏請考官

上命左春坊大學士楊士奇翰林院侍講周述考試

辛丑擢庶吉士周崇厚高穀宋琰胡觀朱杲章文昭

張益柴蘭為中書舍人

三月癸亥朔 辛巳 上御奉天殿閱舉人對策擢

曾鶴齡為第一

五月壬戌朔命曾鶴齡為翰林院修撰劉矩裴倫俱

為編修第二甲第三甲原習譯書衛恕陳融溫良姚

本張恕萬碩黃澍楊昂王連李學吳得全朱子福王



振蔣謙韋昭等為庶吉士隸翰林院 是日陞翰林院修撰余鼎為本院侍讀

七月辛酉朔 丙寅擢翰林院庶吉士周叙尹鳳岐習嘉言楊珙陳詢俱為本院編修典籍黃約中庶吉士彭麟應秦初黃裳陳善韋昭連智莊約許彬胡讓王諭馬信李冠祿萬完甄諲陳紀張式鄭猷俱為檢討庶吉士楊盛寇厚衛恕張恕沈讓段萑姚本陳融溫良俱為中書舍人

九月辛酉朔 壬戌陞左春坊左庶子鄒濟為詹府少詹事右春坊右中允黃琮為右庶子

十月庚寅朔 庚戌陞翰林院侍講鄒緝為左春坊左庶子仍兼侍講庶吉士董璘為編修

十一月庚申朔 辛巳翰林院侍讀李時勉坐累下獄

永樂二十年九月乙卯朔 庚申左春坊左庶子兼翰林院侍講鄒緝卒緝字仲熙江西吉水人自少力學博極群書為人不尚彫繪自學官用薦陞國子助教 上初即位擢翰林侍講尋兼左中允秩滿陞左庶子仍兼侍講與修 太祖高皇帝實錄及永樂大典居官勤慎小心國子監缺祭酒屢奉 命署監事



嘗患背疽 上特命中官督醫往療仍賜名藥緝務  
持正義與衆辨論不苟為異同與朋友交必輔引於  
正或淪患難必極力濟之性澹泊祿食三十年儉素  
不改布衣時所嗜獨書籍及卒家無餘貲藏書數千  
卷而已與緝同時有陳仲完者福州長樂人自教官  
入翰林為編修無左春坊左贊善為人溫厚質實與  
物無競平居寡言至於論是非可否據禮揆義無所  
回撓嘗有 詔汰在京諸司冗官 皇太子命兩坊  
長官簡賢者留之庸者汰之時鄒濟為左春坊長執  
筆畏縮不敢下遽起稱疾不出次當仲完長坊事即

提筆書某當留某當汰衆皆服其明決被汰者亦自  
愧服仲完授 皇孫經多所輔益歷官二十年不遷  
怡然自足 皇太子恒言春坊如陳仲完不易得後  
緝月餘亦卒又有陳濟者常州人尚書洽之兄博學  
強識當時鮮倫詔修永樂大典自布衣召入為總裁  
書成授右春坊右贊善後仲完未幾亦卒 癸亥以  
左春坊大學士楊士奇輔導有闕下錦衣衛獄 癸  
酉釋楊士奇復舊官 己巳宴隨征將士以文淵閣  
大學士兼翰林院學士楊榮金幼孜扈從之勞特命  
坐前列食 上肴各賜二品金織紵絲衣一襲鈔五



千貫

永樂二十一年八月己酉朔 甲寅順天府請考官  
皇太子令翰林侍講王英修撰林誌考試

十一月戊寅朔 丁亥 皇太子聞內侍黃儼江保

數造危語譖之於上皆不聽 皇太子召左春坊大

學士楊士奇至文華殿語之故因歎曰天可欺乎非

賴至尊聖明尚得在此哉士奇對曰殿下益宜自處

盡道 皇太子曰盡心子職而已他有何道

永樂二十二年二月丁未朔 壬子禮部會試天下

舉人奏請考試官 命翰林院侍讀學士曾榮侍講

余鼎考試賜宴于禮部

三月丁丑朔 己卯 上御奉天門閱舉人對策擢

邢寬為第一 庚子命第一甲進士邢寬為翰林院

修撰梁禔孫曰恭為編修其第二甲第三甲徐賢何

志薛理李芳蔡英葛陵等為庶吉士

四月丙午朔 丁卯 皇太子陞吏科給事中張瑛

禮科給事中戴倫為左春坊左中允

六月甲辰朔 庚申 皇太子陞司經局洗馬姚友

直為左春坊左庶子司直郎王文貴為司經局洗馬

永樂二十二年七月辛卯 太宗皇帝以征虜寇上



賓于行在先日遺命 皇太子即皇帝位八月甲辰  
文淵閣大學士兼翰林院學士楊榮御馬監少監海  
壽傳 遺命至北京 帝慟哭幾絕強起拜受 命  
既而命尚書蹇義大學士楊榮楊士奇議一應合行  
事宜及同呂震議喪禮

仁宗八月十五日即位 己未置太師太傅太保階

正一品少師少傅少保階從一品 上諭吏部尚書

蹇義曰此 皇祖之制也 皇考聖明天縱可不置

此官予歷事未廣不無望於保傅卿等勉之遂命義  
為少保仍兼吏部尚書二俸俱給 陞文淵閣大學

宣德十年正月癸酉朔 乙亥

宣宗皇帝崩 時初三日 壬午

英宗皇帝即位 時初十日 戊戌北京國子監祭酒

貝泰奏將監生所作課業做書按季送翰林院考較  
年終奏繳文冊數目從之

三月癸酉朔 庚辰陞行在翰林修撰劉翀為山西

按察司僉事改行在工部主事王一寧為行在翰林  
院修撰仍支正六品俸行在禮科給事中朱應康振

俱為行在翰林院檢討

五月壬申朔 己亥陞行在翰林院待詔趙琬為北



京國子監司業

七月庚午朔行在禮部以應天鄉試奏請考官 上命行在左春坊左庶子兼侍讀周述侍讀苗衷為之丙子纂修 宣廟實錄以太師英國公張輔為監修少傅兵部尚書兼華蓋殿大學士楊士奇少傅工部尚書兼謹身殿大學士楊榮禮部尚書兼翰林學士楊溥少詹事兼翰林侍讀學士王英少詹事兼侍講學士王直為總裁 戊寅陛行在翰林院修撰金問為太常寺少卿兼侍讀學士

八月庚子朔 癸卯命侍讀學士李時勉侍講高穀

士兼翰林院學士楊榮為太常寺卿金幼孜為戶部右侍郎俱仍前職左春坊大學士楊士奇為禮部左侍郎兼華蓋殿大學士陛前右春坊大學士兼翰林院侍讀黃淮為通政使兼武英殿大學士榮幼孜士奇淮俱掌內制不預所陞職務陛前司經局洗馬兼翰林院編修楊溥為翰林院學士前司經局正字金問為翰林院修撰

九月癸酉朔 乙亥陞翰林院侍讀王直為本院侍讀學士侍講王英為侍講學士修撰林誌檢討錢習禮為侍讀檢討余學夔五經博士王進為侍講 丁



食陽沙錄 卷之十一  
亥改淮府右長史王榮為吏科左給事中荆府右長  
史曹曼齡為翰林院修撰二人侍 上於春宮凡書  
表奏及機務文字悉專之故有是命壬辰命宗人府  
經歷黃琮致仕琮嘗事 上於東宮為春坊中允後  
進左庶子上 即位改經歷至是憫其老命致事  
丁酉進少保兼吏部尚書蹇義為少傅禮部左侍郎  
兼華蓋殿大學士楊士奇為少保俱兼職如故太常  
寺卿兼文淵閣大學士翰林院學士楊榮為太子少  
傅置謹身殿大學士命兼之戶部右侍郎兼文淵閣  
大學士翰林院學士金幼孜為太子少保兼武英殿

太常寺卿呂震為太子少師戶部尚書夏原吉為太  
子少傅兵部尚書李慶為太子少保震原吉慶皆尚  
書如故戶部尚書郭資兼太子賓客刑部尚書吳中  
工部尚書黃福俱兼詹事府詹事太僕寺卿郭敦為  
戶部左侍郎及吏部左侍郎郭進俱兼少詹事改進  
名璉陞監察御史黃宗載艾良俱為詹事府丞曾棨  
為左春坊大學士仍兼翰林院侍讀學士王英為右  
春坊大學士仍兼翰林院侍講學士王直為右春坊  
右庶子仍兼翰林院侍讀學士周述為左春坊左諭  
德兼翰林院侍讀林誌為右春坊右諭德仍兼翰林



院侍讀改左春坊左諭德張瑛右春坊右諭德戴倫  
俱為司經局洗馬刑部主事張宗璉中書舍人張侗  
俱為左春坊左中允陞翰林院編修徐永達林長懋  
俱為右春坊右中允藺從善為左春坊左贊善國子  
監助教王讓為右春坊右贊善翰林院檢討蔣驥中  
書舍人高毅俱為左春坊左司直郎吏科給事中蔣  
先國子監博士張景良俱為右春坊右司直郎

十一月壬申朔 丙戌進少傅吏部尚書蹇義為少  
師少保兼華蓋殿大學士楊士奇為少傅俱兼職如  
故太子少傅戶部尚書夏原吉為少保仍兼原二職

太子少師禮部尚書呂震為太子太保仍兼禮部尚  
書太子賓客都察院左都御史劉觀為太子少保仍  
兼左都御史工部尚書兼詹事府詹事吳中為太子  
少保兼工部尚書俱給二俸賜原吉繩愆糾繆圖書

館閣漫錄卷之一



館閣漫錄卷之二

洪熙 宣德 正統

不二齋校梓

洪熙元年正月壬申朔 丙子陞通政使兼武英殿  
 大學士黃淮為少保戶部尚書仍兼武英殿大學士  
 加少傅兼華蓋殿大學士楊士奇兵部尚書太子少  
 保兼武英殿大學士金幼孜禮部尚書俱三俸並支  
 仍掌內制 贈故詹事府少詹事鄒濟左春坊左贊  
 善徐善述俱為太子少保賜濟謚文敏善述謚文肅  
 丁丑少傅兵部尚書華蓋殿大學士楊士奇及少保  
 戶部尚書兼武英殿大學士黃淮俱奏辭尚書一俸



從之太子少傅工部尚書兼謹身殿大學士楊榮太子少保禮部尚書兼武英殿大學士金幼孜亦各辭尚書一俸以扈從 皇考勤勞不准辭 己卯建弘文閣先是 上諭大學士楊士奇等曰卿等各有職務朕欲別得學行端謹老儒數人日侍燕閒備顧問可咨訪以聞士奇以翰林侍講王進蘇州儒士陳繼對遂命吏部召繼至是建弘文閣於思善門外作印章命翰林院學士楊溥掌閣事進佐之上親舉印授溥曰朕用卿等於左右非止助益學問亦欲廣知民事為理道之助卿等如有建白即以此封識進來未

幾繼至授翰林院五經博士吏部尚書蹇義言學錄楊敬訓導何澄皆敦實即授敬翰林院編修澄禮科給事中命三人皆於弘文閣與進同事云 己亥太子少保禮部尚書兼武英殿大學士金幼孜奏臣祇奉聖恩賜誥命封贈二代此臣子之至榮近復蒙詔書許文臣省親祭祖臣離家二十六年臣母見年八十有二今欲援例歸省焚黃 上喜特賜白金五十兩鈔萬貫命兵部給驛俾歸自是朝臣請告還鄉省親祭祖比比矣 贈故左春坊左贊善兼編修王汝玉為太子賓客賜謚文靖遣官致祭



二月辛丑朔 戊午陞國子監祭酒兼侍講胡儼為太子賓客仍兼祭酒命致仕

三月辛未朔 壬申陞前光祿寺署丞權謹為文華殿大學士謹居家事母孝有司以聞驛召至京 上以孝子必忠可任輔導遂超陞是職 擢行人司右司副張洪為翰林院修撰 丁酉陞翰林院學士楊溥為太常寺卿仍兼學士

四月庚子朔 庚戌 上諭禮部臣曰科舉之士須南北兼取南人雖善文詞而北人尊重比累科所選北人僅得什一非公天下之道自今科場取士以十

分論南士取六分北士取四分爾等其定議各布政司名數以聞 辛亥命成國公朱勇豐城侯李賢都督郭義李通太子少保兼兵部尚書李慶工部尚書兼詹事府詹事黃福戶部左侍郎兼詹事府少詹事郭敦都察院右副都御史胡廣太常寺少卿徐善淵左春坊大學士兼翰林院侍讀學士曾榮左春坊左庶子陳山司經局洗馬張瑛戴倫左春坊左諭德兼翰林侍讀周述右春坊右諭德兼翰林侍讀林誌等侍 皇太子謁祭 皇陵 孝陵 壬子加贈故文淵閣大學士兼左春坊大學士贈禮部尚書謚文穆



食肉沙金  
胡廣仍賜祭文賜其家白金百兩鈔萬貫紵絲八表  
裏 甲寅賜蹇義蹇忠貞印一枚楊士奇楊貞一印  
一枚皆使用藏于家傳之後世

五月庚午朔 癸酉勅行在禮部翰林院修 太宗  
實錄以太師英國公張輔少師兼吏部尚書蹇義少  
保兼太子少傅戶部尚書夏原吉為監修少傅兵部  
尚書兼華蓋殿大學士楊士奇少保戶部尚書兼武  
英殿大學士黃淮太子少傅工部尚書兼謹身殿大  
學士楊榮太子少保禮部尚書兼武英殿大學士金  
幼孜太常寺卿兼翰林院學士楊溥為總裁 己卯

行在翰林院侍讀李時勉侍講羅汝敬俱以言事改  
都察院掌道監察御史 庚辰 上不豫召尚書蹇  
義大學士楊士奇黃淮楊榮至思善門命士奇書勅  
遣中官海壽馳召 皇太子 辛巳 上崩于欽安  
殿

洪熙元年六月己亥朔 庚戌 上即皇帝位 丙  
辰以侍從舊恩陞右春坊右贊善王讓為行在吏部  
右侍郎左春坊左庶子陳山為行在戶部左侍郎司  
經局洗馬張瑛為行在禮部右侍郎戴倫為行在兵  
部右侍郎



閏七月戊戌朔 癸卯改詹事俞士吉為刑部侍郎  
甲辰以太子賓客兼國子監祭酒胡濙仍為禮部左  
侍郎兼職如故 乙巳纂修 仁宗實錄以太師英  
國公張輔太子太保成山侯王通少師吏部尚書蹇  
義少保兼太子少傅戶部尚書夏原吉為監修少傅  
兼華蓋殿大學士楊士奇少保戶部尚書兼武英殿  
大學士黃淮太子少傅工部尚書兼謹身殿大學士  
楊榮太子少保禮部尚書兼武英殿大學士金幼孜太  
常寺卿兼翰林學士楊溥為總裁 甲子陞右春坊  
右司諫羅 為襄府左長史以侍王講學久也

乙丑行在太常寺卿兼翰林學士楊溥奏 仁宗皇  
帝臨御時命臣與侍講王進編修楊敬五經博士陳  
繼給事中何澄於思善門外弘文閣侍討論經籍今  
當納上弘文閣印各還原任 上曰然溥與楊士奇  
等同治內閣事王進等四人各以原職隸翰林

八月丁卯朔 癸未以前司經局正字王雅為翰林  
院檢討雅坐累謫交趾 仁宗即位念其舊臣遣使  
召之至是始至 上曰此先帝所素重者遂有是命  
九月丁酉朔 乙卯特免太子少傅工部尚書兼謹  
身殿大學士楊榮戶內徭役 乙未陞詹事府丞鄭



燧為行在大理寺左寺丞主簿倪宗為行在光祿寺丞錄事高遠右春坊司諫林宗儒俱為行在鴻臚寺司賓署丞王永錫為司儀署丞左春坊左中允張宗璉為大理寺右寺丞贊善蘭從善左司直郎蔣驥高穀俱為行在翰林侍講右春坊右中允徐永達為行在鴻臚寺左少卿林長懋為蔚州知州右司直郎蔣先為行在尚寶司丞張景良為四川順慶府通判清紀郎韓岫為行在戶科給事中張昱為行在刑科給事中司諫吳顥為國子監助教馮景浩為行在禮科給事中正字陶永成為北京國子監學正 文華

殿大學士權謹以通政司叅議致仕

十月丙寅朔 戊辰擢儒士楊翥為行在翰林院檢

討 丁丑行在翰林院修撰李騏卒騏初名馬戊戌

進士第一 太宗改今名 丙戌行在吏部尚書蹇

義等言初 皇上正位儲宮 仁宗皇帝以勲臣陽

武侯薛祿等兼太子太傅之職尚書黃福等兼詹事

及翰林儒臣兼職春坊俸皆兼支今 皇上嗣承大

統宜各去兼職 上曰此 皇考簡以輔朕者朕即

位正須加恩俾朝夕左右未可遽罷兼官自師保至

春坊學士庶子諭德兼職者祿秩皆仍舊非兼職者



陞擢之

十一月丙申朔 丁酉擢行在中書舍人葉蓁姚秩  
為行在翰林院編修

十二月丙寅朔 乙亥擢翰林院庶吉士周忱為本  
院檢討

宣德元年三月乙未朔 丙午右春坊大學士兼行  
在翰林院侍講學士王英奏母年老道遠艱於迎養  
乞以南京每月侍講學士俸於本貫官倉支給以備  
養從之

五月甲午朔 丁酉擢左春坊左中允王愷為廣西

按察司僉事詹事府主簿程中為戶部員外郎 已  
酉以纂修實錄勅召武英殿大學士金幼孜翰林學  
士楊溥侍讀錢習禮侍講陳敬宗陳循檢討劉永清  
等時幼孜敬宗永清以憂去溥習禮循請告省親故  
也 丁巳行在翰林院侍講學士沈度九載考滿陞  
本院學士

七月壬辰朔 丙午命右春坊右諭德林誌翰林侍  
講余學夔為應天府鄉試考官

八月壬戌朔 丁卯遣侍講學士王英釋奠先師孔  
子 己巳 上親征漢王命少師蹇義少傅楊士奇



少保夏原吉太子太傅楊榮太常卿楊溥叅預機務  
賜鞍馬給鎧冑弓劍扈從

十二月庚申朔 辛未陛行在翰林院檢討劉永清  
為本院修撰

宣德二年二月己未朔 癸亥陛行在戶部左侍郎  
陳山為本部尚書兼謹身殿大學士行在禮部左侍  
郎張瑛為本部尚書兼華蓋殿大學士 丙寅命翰  
林院學士楊溥侍讀學士曾榮為禮部會試考官賜  
宴于本部 丁卯遣太子太傅工部尚書兼謹身殿  
大學士楊榮釋奠孔子

三月己丑朔 辛丑擢第一甲進士馬愉為行在翰  
林院修撰杜寧謝璉為編修第二甲第三甲江玉琳  
等九十六人令歸進學邢恭為翰林院庶吉士恭先  
習譯書故特命之

四月己未朔 辛未陛行在翰林編修蔣禮為修撰  
五月戊子朔 庚子右春坊右諭德兼翰林院侍讀  
林誌卒誌福州人舉會試第一居官十五年兩考京  
畿鄉試 乙卯以翰林編修陳景著為福州府儒學  
教授喪父服闋自陳母老乞改近鄉教官便養故命  
之



七月丁亥朔 丁酉改翰林院侍講陳敬宗為國子  
司業 上曰侍講清華之職司業師表之任秩雖未  
崇其任則重亦可謂儒者之榮矣

八月丙辰朔 甲子少保戶部尚書兼武英殿大學  
士黃淮以疾求退疏甚懇時年僅踰六十 上覽奏  
惻然顧謂少傅楊士奇太子少傅楊榮太子少保金  
幼孜曰淮與卿等同事 皇祖 皇考今三十年勤  
勞多矣而其疾若此固留之則情有不可宜令暫還  
家養疾若稍平復即當復來卿等以朕意諭之遂遣  
中官賜鈔萬貫 乙亥少保黃淮以疾歸陛辭命行

在兵部給舟車復賜鈔萬貫

宣德三年二月癸丑朔 丁巳遣北京國子監祭酒  
貝泰釋奠先師孔子

三月癸未朔 壬戌少傅兵部尚書華蓋殿大學士  
楊士奇請以南京月支學士俸太子少傅工部尚書  
兼謹身殿大學士楊榮請以太子少傅俸太子少保  
禮部尚書兼武英殿大學士金幼孜請以太子少保  
俸戶部尚書兼謹身殿大學士陳山請以尚書俸俱  
於本貫官倉關支以給其家皆從之

四月癸丑朔 丙辰故兵部尚書金忠子達奏昔蒙



仁宗皇帝厚恩授翰林檢討令還寧波府學支俸讀書比因母喪有司停俸臣實蒙恩優養非見任離職之比 上命行在戶部給俸如故

閏四月壬午朔 壬寅陞南京翰林院檢討陳用為本院修撰

九月庚戌朔 癸丑虜寇犯邊 上親征命太子少傅楊榮從

十月己卯朔 乙酉 上謂群臣曰古者師保之職論道經邦寅亮燮理不煩以有司之政今少師蹇義少傅楊士奇少保夏原吉太子少傅楊榮皆 先帝

簡畀以遺朕者而年俱高令兼有司之務非所以禮之於是賜勅諭義士奇原吉榮曰卿等祇事 祖宗多歷年所忠謨讜議積効勤誠朕嗣統以來允資贊輔夙夜在念圖善始終蓋卿春秋高尚典繁劇優老待賢禮非攸當况師保之重寅亮為職不煩庶政乃副倚毗可輟所務朝夕在朕左右相與討論至理共寧邦家職名俸祿悉如舊卿其專精神審思慮益致嘉猷用稱朕眷注老成之意欽哉

宣德四年二月丁丑朔 遣北京國子監祭酒貝泰釋奠孔子



四月丙子朔 丙戌陛行在翰林檢討胡種為本院  
修撰 丁亥陛行在吏部左侍郎兼少詹事郭璉為  
本院尚書罷其兼職 丁酉南京進鮭魚早薦 奉  
先殿獻 皇太后午 上御文華殿召大學士楊士  
竒楊榮金幼孜特賜鮭魚醇酒加賜御製詩有樂有  
嘉魚之句士竒等霑醉獻和章 上喜曰朕與卿等  
皆當以成周君臣自勉庶幾不忝祖宗付託

五月丙午朔 癸丑命行在禮部尚書胡濙兼掌詹  
事府詹事

七月乙巳朔 己未命翰林院侍讀錢習禮修撰劉  
永清為應天府鄉試考官 車駕臨文淵閣與少傅  
楊士竒太子少傅楊榮論經史遂咨政務已而悉召  
諸學士及史官諭之曰國史貴詳實卿等宜盡心於  
是 賜士竒等及學士以下鈔有差

八月乙亥朔 丁丑遣貝泰釋奠孔子 戊寅行在  
翰林院學士沈度奏臣年七十有三乞賜骸骨還鄉  
里 上諭吏部尚書郭璉曰度誠謹 皇祖眷之彌  
厚今雖老精神未衰亦不可煩以事但令居京食祿  
免朝參有召則入 己卯行在禮部奏太常寺卿兼  
翰林學士楊溥母太淑人卒 上命遣官賜祭視武



臣二品例賜米五十石功布五十疋仍命有司治葬  
辛巳命右庶子兼侍讀學士王直侍讀李時勉為順天  
府鄉試考官 庚子行在翰林院侍講高穀服闋復職  
十月甲戌朔 庚辰 上臨視文淵閣少傅楊士奇  
太子少傅楊榮太子少保金幼孜學士楊溥曾榮王  
直王英侍讀李時勉錢習禮侍講陳循等侍 上命  
典籍取經史親自披閱與士奇等討論已詢以時政  
從容密勿者久之命中官出尚膳酒饌賜士奇等并  
賜纂修實錄官士奇等叩首謝 上曰朕聞有道之  
朝願治之主崇禮儒碩講求治道卿等為朕傳保與

諸學士皆處秘閣朕躬至訪問冀有所聞耳稍暇當  
復至卿等必有所陳論也已而親製詩賜士奇等詩  
曰秘閣弘開當巽隅充棟之積皆圖書仙家蓬山此  
其處上與東壁星相符罷朝閒暇一臨視衣冠左右  
環文儒瓊琚鏘鏘清響振寶鼎馥馥香烟敷維時日  
上扶桑初始看曛隴絢綺䟽忽已燦爛明金鋪從容  
燕坐披典謨大經大法古所訓講求啓發良足娛朝  
廷治化重文教日暮切磋安可無諸儒志續漢仲舒  
豈直文彩凌相如玉醴滿賜黃金壺勗及及時相勵  
翼輔德當與夔龍俱庶幾致治希唐虞 戊子早朝



罷 上復臨視文淵閣儒臣叩頭畢列侍左右 上  
從容顧問所治職業遂具論自古帝王及 祖宗時  
事 上甚悅命中官出內帑鈔徧賜儒臣又親書御  
製詩一章以賜明日少傅楊士奇太子少傅楊榮等  
上表謝 庚寅改行在禮部尚書兼華蓋殿大學士  
張瑛為南京禮部尚書兼職如故命行在戶部尚書  
兼謹身殿大學士陳山專授小內使書

宣德五年正月壬寅朔 癸亥以 太宗皇帝 仁

宗皇帝兩朝實錄成賜監修官太師英國公張輔少  
師兼行在吏部尚書蹇義少保兼太子少傅行在戶

部尚書夏原吉總裁官少傅行在兵部尚書兼華蓋  
殿大學士楊士奇太子少傅行在工部尚書兼謹身  
殿大學士楊榮太子少保行在禮部尚書兼武英殿  
大學士金幼孜太常寺卿兼行在翰林院學士楊溥  
白金各一百兩綵幣各六表裏織金羅衣各一襲馬  
各一匹并鞍續至總裁官行在戶部尚書陳山禮部  
尚書張瑛白金各六十兩綵幣各五表裏織金羅衣  
各一襲纂修兼考校官左春坊大學士兼行在翰林  
院侍讀學士曾榮右春坊大學士兼行在翰林院侍  
講學士王英右春坊右庶子兼行在翰林院侍讀學



士王直左春坊左諭德兼行在翰林院侍讀周述行在翰林侍讀李時勉錢習禮侍講余學夔陳循蔣驥白金各五十兩綵幣各四表裏素羅衣各一襲纂修官侍講藺從善修撰苗衷曾鶴齡張洪劉永清編修周叙孫曰恭楊敬檢討王雅揚翁五經博士陳繼戶部主事陳中行在四川道監察御史張叔剛福建布政司右叅議潘文奎四川重慶府榮昌縣知縣萬節浙江衢州府儒學教授丘錫陝西漢陰縣儒學教諭梁萼白金各四十兩綵幣各三表裏素羅衣各一襲催纂官行在禮部主事張習騰寫正本兼錄藁官行

在禮部郎中朱暉行在吏部郎中程南雲行在禮部郎中陳景茂行在吏部員外郎宣嗣宗夏衡行在中書舍人俞宗大陸友仁蕭湘羅淵張益白金各二十五兩綵幣各二表裏素羅衣各一襲騰寫副本兼錄藁官行在中書舍人宋琰黃振宗干霈凌壽胡觀劉鉉胡宜衡解損期行在大理寺右寺副丘宗揚玦白金各二十兩綵幣二表裏素羅衣各一襲續至騰寫副本兼錄藁官行在吏部主事蘇鑑行在中書舍人周崇厚白金各十五兩綵幣各一表裏素羅衣各一襲騰藁及稽考叅對官行在翰林院修撰邢寬蔣禮



胡種編修劉矩裴綸陳詢梁禔檢討許彬連智馬信  
周貴孔目沈寅行在中書舍人王璜寇厚胡宗蘊行  
在禮部郎中黃養正禮部主事王觀行在大理寺左  
寺副洪益中右寺副邵暹續至謄寫副本官行在中  
書舍人龐叙白金各十五兩綵幣各一表裏素羅衣各  
一襲收掌文籍官行在翰林院檢討胡讓典籍李錫  
牛麟張禮白金各十兩綵幣各一表裏素羅衣各一襲  
三月辛丑朔丁巳 上親閱舉人陳詔等所對策  
賜林震等一百人進士及第出身有差 乙巳命大  
學士楊士奇楊榮金幼孜曰新進士多年少其間豈

無有志於古人者朕欲循 皇祖時例選擇俊秀十  
數人就翰林教育之俾進學勵行工於文章以備他  
日之用卿等可察其人及選其文詞之優者以聞於  
是士奇等選薩琦逯端葉錫陳璣林補王振許南傑  
江淵八人以聞 上命行在吏部俱改為庶吉士送  
翰林院進學給酒饌房舍月賜燈油鈔悉如永樂之  
例復命兵部各與皂隸 上又顧士奇等曰後生進  
學必得前輩老成開導之卿等曰侍左右無餘閒其  
令學士王直為之師常提督教訓所作文字亦為開  
發改竄卿等或一兩月或三月一考閱之使有進益



如一二年怠惰無成則黜之又命禮部尚書胡濙曰  
進士新入翰林各賜文綺衣一襲鈔三百貫 庚午擢  
第一甲進士林震為行在翰林院修撰林文為編修  
四月辛未朔 甲申陞太子少傅工部尚書兼謹身  
殿大學士楊榮為少傅尚書大學士如故 乙酉楊  
榮奏今蒙 聖恩陞臣少傅仍兼尚書學士二職三  
俸兼支願辭學士俸其少傅俸如前於原籍關支在  
京止關尚書俸從之 兩朝實錄成陞纂修官左春  
坊大學士兼翰林侍讀學士曾榮為詹事府少詹事  
仍兼翰林侍讀學士右春坊大學士兼翰林侍講學

士王英右春坊右庶子兼翰林侍講學士王直為少  
詹事英仍兼侍講學士直仍兼侍讀學士左春坊左  
諭德兼翰林侍讀周述為左庶子仍兼侍讀侍讀李  
時勉錢習禮俱為侍讀學士侍講蔣驥陳循俱為侍  
講學士侍講藺從善為司經局洗馬修撰劉永清邢  
寬胡種為侍講蔣禮為左春坊左中允編修周叙孫  
曰恭楊敬為修撰檢討王雅揚翁許彬周貴為編修  
五經博士陳繼為檢討典籍張禮為行人司行人孔  
目沈寅為司經局正字行在四川道監察御史陳叔  
剛為翰林修撰儒士鄒循為待詔生員朱銓為侍書



行在禮部郎中蔣暉行在吏部郎中程南雲陞從四品祿兼翰林侍書行在吏部員外郎夏衡宣嗣宗為本部郎中叅議潘文奎令致仕行在禮部主事張習王觀行在吏部主事蘇鑑戶部主事陳中俱為本部員外郎行在大理寺左寺副洪益中為左寺正右寺副丘宗楊玳邵暹為右寺正中書舍人蕭湘張益凌壽胡宜衡為左評事解禎期周崇厚王璜寇厚為右評事知縣萬節為左寺副教授丘錫為建昌府學教授陞正九品祿教諭梁萼為衢州府學教授辦事吏翁選等十人俱為縣丞翰林侍講余學夔當陞自陳

老疾乞致仕從之 丙辰以任滿考稱陞行在翰林修撰曾鶴齡為本院侍讀檢討連智胡讓待詔周迪行在中書舍人朱祚俱為行在翰林院修撰典籍牛麟李錫為檢討行在中書舍人吳餘慶為右春坊右中允仍治中書舍人事 擢進士龔錡為行在翰林院編修錡與林震皆第一甲進士授官之日有疾至是疾愈始命之

七月乙丑行在禮部右侍郎蔣驥卒驥字良夫浙江錢塘人由進士授行人永樂初預修 高廟實錄陞翰林檢討修永樂大典為副總裁 仁宗皇帝即位



陸左春坊左司直郎 上即位陞翰林侍講同考禮部會試預修 兩朝實錄成賜白金文綺陞侍講學士無幾又陞禮部右侍郎視事幾二旬得疾遽卒  
八月己巳朔 丁丑遣少傅楊榮釋奠先師孔子  
癸巳賜少傅楊榮誥命加封其三代及妻 甲午行在吏部奏戶部尚書兼詹事黃福九載任滿上命復職  
九月己亥朔 甲寅陞北京國子監博士黃胤宗助教郭俊為翰林院檢討仍理博士助教事 翰林院編修鍾瑛服闋復職

宣德六年二月丙申朔 乙巳召少師蹇義少傅楊

士竒楊榮尚書胡濙至文華後殿諭之曰昨日恭侍太后進壽觴 太后甚歡朕及暮還宮不覺亦醉既覺而思仰荷 上天眷佑 祖宗慶澤 聖母之教訓今田穀屢豐天下粗安得朝夕侍奉 聖慈遂天倫之樂可為幸矣又念國事賴卿等旦夕同心協慮遂出御製詩賜義等再賜特宴云 己未陞國子監助教張山觀為翰林檢討仍理助教事 行在翰林院檢討陳紀秦初服闋復職

六月癸巳朔 戊申新作行在禮部成錫宴落成之命公侯駙馬伯都督尚書侍郎都御史學士祭酒及



通政司大理寺太常寺光祿寺鴻臚寺掌印官及本部屬官皆與焉

八月癸巳朔 癸丑以九年任滿陞行在翰林院編修朱孔暘為左春坊左中允

十月壬辰朔 庚申陞行在翰林院修撰由衷為侍讀編修劉矩為修撰

十一月壬戌朔 癸亥 上御文華殿召少傅楊士竒楊榮學士楊溥入侍 上曰朕念我 仁祖積德

累善薦生 太祖皇帝繼天立極創業垂統 太宗皇帝汎掃奸回再安 宗社 皇考仁宗恢弘治化

增高累厚以固鴻業朕承天位夙夜不忘記曰先祖有美而不知不明知而不傳不仁是用撰述成詩揭之座上朝夕覽觀勉圖繼述庶幾永保天命今以刻石特賜卿摹本卿當思我 祖宗開創之難守成之不易盡心輔朕國家安卿等亦與享榮利士竒稽首受賜詩凡九章 上自序之其文曰昔者胡元之季上天厭之眷求聖德俾作民主我 仁祖皇帝有純粹之性誠一之心蘊至仁而弗驚篤大義而不銜體正而養和履醇而抱潔循乎自然安乎天順蓋動與天游靜與道俱易所謂大人魯論所謂至德者也用



集天命大開厥祥萬生我 太祖皇帝其仁如天其  
智如神道冠百王德侔五帝汎掃六合綏寧萬邦正  
天紀立人極詩書禮樂之華典章法度之懿超越隆  
古矣 皇祖太宗皇帝以太德承大統神武赫著聖  
神弘施近悅遠來內安外服茂勲鴻烈允光于前  
皇考仁宗皇帝丕宣大猷恢章美化仁恩惠澤益廣  
益深是以普天之下莫不尊親同心愛戴至于今日  
顧予菲薄克遂承繼揆度所自厥有明徵實由 仁  
祖皇帝源本之隆肆 太祖皇帝開創之大而我  
皇祖 皇考得以恢廓而維持之萬世之業所由定

也列聖之德與天為一謹叙述為詩九章以昭後世  
詩曰 上天信崇高臨下明以赫元季政昏亂 帝  
用厭夷狹眷求令德宗視乃善慶積霈然啓其祥疆  
宇俾開闢 一章 恭惟我 仁祖躬備大聖德天性稟  
純粹溫恭而允塞萬志在仁義兼亦貴稼穡寶王之  
所藏山川被光澤 二章 維時屬遘屯畎畝足自適進  
退與道俱德行懷貞白 皇天鑒昭晰寶命所由錫  
萬生 太祖聖配天立人極 三章 海內如鼎沸土壤  
紛割析蒼生靡怙恃倪伏斃毒螫仗劍起濠梁奉天  
拯焚溺再駕定東南一舉下西北 四章 曠我六合內



腥穢悉蕩滌三光復宣朗五典重修飭遠齊堯舜功

近過湯武績遂令普天下休養樂生息五章 太宗

削姦回繼統奠宗社聖文既炳煥神武允赫奕賢才

盡登用秉德合修職庶邦承覆載貢獻來九譯六章

昭考撫盈成至仁弘隱惻民安視如傷恭已臨萬國

繼志與述事夙夜懷兢惕皇風益清穆皇道彌正直

七章 正本所自隆 仁祖實啓迪祥源深且廣天派

肆洋溢聖神紹傳序茂衍萬世曆造商本玄王興周

美后稷八章 茲予嗣鴻業時幾謹申勅 四聖赫在

天悠久貽法式保佑賴深眷負荷愧綿力稽首陳詠

歌庶用示無斁九章

十二月壬辰朔 丁未太子少保禮部尚書兼武英

殿大學士金幼孜卒幼孜江西新淦人由進士擢給

事中 太宗皇帝初臨御簡求文學之臣改翰林院

檢討又簡置內閣治密務數月陞侍講永樂五年陞

右春坊右諭德仍兼侍講 太宗北征扈從與修

太祖實錄及五經性理大全書陞翰林院學士仍兼

諭德實錄成陞文淵閣大學士仍兼學士 仁宗嗣

位進戶部右侍郎仍兼文淵閣大學士翰林學士諭

月陞太子少保兼武英殿大學士專典內制卒贈榮



食附錄卷之二  
三十一  
祿大夫少保謚文靖

宣德七年正月辛酉朔 辛巳詹事府少詹事兼翰林院侍讀學士曾榮卒榮字子啓江西吉安府永豐縣人永樂甲申進士第一授修撰時上嚮用儒術命選新進士二十八人進學文淵閣以榮為首命光祿寺給朝夕膳月賜燈燭費每燕閒召試榮率居第一修永樂大典為副總裁進侍講 太祖實錄成陞侍讀學士 仁宗即位陞左春坊大學士仍兼侍讀學士 上即位陞詹事府少詹事兼侍讀學士卒贈禮部左侍郎遣禮部侍郎章敞賜祭命有司治葬

三月庚申朔癸亥賜尚書蹇義楊士奇楊榮胡濙太常寺卿楊溥南京抽分柴人 十萬斤 丁卯以九載考最陞行在翰林編修裴綸為修撰 己巳少保戶部尚書兼武英殿大學士致仕黃淮父思恭卒思恭嘗封以子官命如例祭葬

五月戊午朔 辛未 上聞少詹事兼侍讀學士王英母卒問尚書胡濙曰英母亦應得賜祭及營葬濙對曰舊制官三品四品父母喪曾受封贈者官為營葬今英官四品其母曾受五品封 上曰儒臣吾所優禮者况非此母無此子其遣官賜祭仍命有司治



葬勿為例

七月丁巳朔 壬戌以考最陞行在翰林院編修尹  
鳳岐檢討黃裳彭麟應俱為本院修撰 辛未命行  
在翰林侍讀學士李時勉侍讀苗衷為應天府鄉試  
考官 丁丑 上視朝退御武英殿翰林儒臣侍因  
論漢唐開創輔臣侍臣對曰蕭曹房杜雖皆常才亦  
當時無過之者有曰天下之廣未必無之但係於遭  
際何如耳 上曰然如三老董公及泰山道士徐洪  
容皆不見用而蕭曹房杜成功誠哉人才遭際為難  
也 庚辰 上燕閒閱內庫書畫得元趙孟頫所繪

函風圖而賦長詩一章召翰林詞臣示之曰函詩周  
公陳后稷公劉致王業之由與民事早晚之宜以告  
成王使知稼穡艱難萬世人君皆當鑑此朕愛斯圖  
為賦詩欲揭於便殿之壁朝夕在目有所儆勵爾其  
書于圖之右

八月丁亥朔 癸巳命左春坊左庶子兼侍讀周述  
翰林侍讀學士錢習禮為順天府鄉試考官賜宴于  
本府 巳亥陞交趾南靈州知州黎恬為右春坊右  
諭德福建建安縣學教諭楊壽夫山東臨清縣學教  
諭彭琉為行在翰林編修



十二月丙戌朔 癸卯致仕少保戶部尚書兼武英  
殿大學士黃淮以父喪蒙賜祭營葬躬詣 闕謝及  
陛辭自陳其子采於翰林院進書學

宣德八年二月乙酉朔 壬辰行在禮部奏請會試  
考官且言致仕少保兼武英殿大學士黃淮在京可  
任其事 上從之命詹事府少詹事兼翰林院侍讀  
學士王直與之俱賜宴于禮部

三月甲寅朔 丙辰 上親閱舉人對策賜曹鷟等  
九十九人進士及第出身有差 巳未 上御左順  
門召少傅楊士竒楊榮尚書胡濙諭曰今年進士及

會試副榜舉人中有年少質美者卿等選三十人具  
名以聞仍令進學 戊辰行在禮部尚書胡濙同少  
傅楊士竒楊榮選新進士及副榜舉人之秀敏者得  
進士尹昌黃瓚趙智陳睿傅綱黃回祖六員舉人龍  
文章瑾李滄梁蔡黃平陳韶田鈞李蒲王鑑朱奎袁  
和林同柴同思張承翰陳康龔理相佐黃輿李柰王  
佐鄭觀胡如暘趙象蔣榮祖二十四人以聞 上命  
行在吏部改進士為庶吉士送翰林院同薩琦等進  
學賜居給酒饌及油鈔悉如永樂中例仍令侍讀學  
士王直訓督之三月一考其文辭以觀其進舉人賜



食邑... 卷之二  
冠帶給訓導俸送國子監進學以待下科會試翰林院三月一考其文與庶吉士同以九年考最陞北京國子監丞侯復為翰林院編修助教張信為翰林檢討仍理監事壬申擢一甲進士曹禹為翰林院修撰趙恢鍾復為編修乙亥上謂少傅楊士奇等曰朕昨會卿等簡庶吉士俾進學因思賢才必自國家教養以成教之不豫安能得其用因作詩述意卿當以朕意諭之俾知自勵詩曰國家用賢良豈但務精擇賢良之所出亦自培養得虞廷教元士周家重俊宅皇祖簡賢科教育厚恩澤二十有八人用

之著成績朕心切旁求夙夜恒側席是科凡百人豈乏卓識爰拔俊茂資將以繼往昔優游詞垣內研究古載籍摘辭務淳龐勵行必端直所期在登庸澤物兼輔德最忝副予望奮志毋自畫壬午勅成國公朱勇新建伯李王及兵部選京衛幼軍年十一至二十體質俊偉萬人隨侍皇太子仍戒勇等毋因事擾人

四月甲申朔丁亥上御奉天門視朝罷顧謂少傅楊士奇楊榮曰朕在宮中無事時偶有真趣則賦一詩自適不然則取書籍玩味亦得胸次開豁故所



在皆置書籍及楮筆之類今修葺廣寒清暑二殿及西瓊島欲與各處皆置書籍卿二人可於館閣中擇能書者數十人取五經四書及說苑之類每書各錄數本分貯其中以備覽閱又曰朕近作廣寒殿記遂命中官取示士奇等其文曰北京之萬歲山在宮城西北隅周迴數里而奠位之皆奇石積疊以成巍巍乎轟轟乎巉峭峻削盤迴起伏或陟絕如壑或嶄岩如屋左右二道宛轉而上步躡屢息乃造其巔而飛樓複閣廣亭危榭東西拱向頰仰輝映不可殫紀其最高者為廣寒殿崇棟飛檐金鋪玉砌重丹疊翠五

彩煥焉軼雲霞納日月高明闔爽而北枕居庸東挹滄海西挾太行嵩岱並立乎前太河橫帶于中俯視江淮一目無際寰中之勝槩天下之偉觀莫加於此矣永樂中朕嘗侍皇祖太宗文皇帝萬幾之暇燕遊於此從容之頃天顏悅懌指顧山川而諭朕曰此古軒轅所都而後來趙宋之疆境也宋弗良于行金取而都之金又弗良元取而都之元之後裔不存殷鑒加弗良焉天鑒我太祖高皇帝聖德命之吊伐用誕安天下天下既定高皇帝念前代故都也簡於諸子以命我黃茲一方我惟夙夜敬勵不敢怠寧



以仰副 高皇帝付託之重暨建文嗣位信用姦回  
戕劉宗室舉四方全盛之師以加我于時茲城孤立  
殆一髮引千鈞矣賴 天地 祖宗之祐獲以城之  
殘弱羸老安其危而存其覆又因以清姦懲奠 社  
稷而至於今日夫山川猶昔也昔之人以否德而失  
之 高皇帝以大德而得之我承籍 高皇帝克艱  
難而保存之柰何其可忘慎德又顧茲山而諭朕曰  
此宋之艮岳也宋之不振以是全不戒而徙於茲元  
又不戒而加侈焉睹其處思其人夏書所為傲峻宇  
雕墻者也肆吾始來就國汰其侈存其槩而時晰焉

則未嘗不有儆于中昔唐九成宮太宗亦因隋之舊  
去其泰侈而不改作時資燕游以存監省汝將來有  
國家天下之任政務餘閒或一登此則近而思吾之  
言遠而不忘聖賢之明訓國家生民無窮之福矣朕  
拜稽受命無時或忘書不云乎 皇祖有訓詩不云  
乎儀刑文王肆嗣位以來凡事 天愛民一體 皇  
祖之心敬而行之洞洞屬屬罔間夙夜比登茲山顧  
視殿宇歲久而弛遂命工修葺永念 皇祖儼如在  
上敬以所授大訓筆而勒諸疑石既以自省亦以昭  
示我子孫於億萬年



六月壬午朔 乙酉 行在翰林編修趙勗以親喪服闋復職

七月壬子朔 丁丑少傅工部尚書兼謹身殿大學士楊榮歷官一考賜勅褒之曰卿以博通之學明敏之識練達之才歷事 皇祖 皇考踰三十年多效勤誠以樹勞績朕承 祖宗大統亦惟資先朝舊臣以匡以輔共圖康濟盖自朕即位以來卿秉誠心躬勤夙夜攄其嘉謀嘉猷贊助不逮朕飭武事懷綏夷狄而軍旅之政四裔之情明習周知莫踰卿者忠言讜議裨益為多肆特陞弘化之職今滿三歲嘉念良

深特宴勞于禮部仍賜勅獎諭自古有言人惟求舊惟朕以至誠任卿惟卿以至誠事朕同務戒傲以令始終庶幾允厯天工用光 祖考欽哉

八月辛巳朔 癸卯翰林院修撰金問任滿命復職陞從五品祿

十月庚戌朔 丙辰少師吏部尚書蹇義少傅兵部尚書兼華蓋殿大學士楊士奇歷官三考皆賜勅獎諭勅士奇曰卿歷事祖宗及今三十餘年始擢禁近在論思之地學廣識明端靖忠厚有良臣之體若佐仁考於監國允積勞勤貞一之褒玉音孔彰肆朕績



承式資贊輔忠言讜議累效厥誠朕志保民孜孜夙  
夜卿同斯志謀猷入告裨益為多今考九載之績深  
用嘉念特宴勞于禮部仍賜勅獎諭於戲朕惟祖  
宗之舊臣同德同心是毘是力卿尚益懋于誠庶幾  
共光我祖宗之洪業欽哉

十一月庚辰朔 甲辰 命尚書蹇義楊士奇楊榮

郭璉胡濙選前科進士取其文學之優者得徐瑄賴  
世隆吳節李紹萬洪虞瑛潘洪王玉陳金劉實鄧建  
方熙何瑄十三人義等以聞命改為庶吉士同薩琦  
等於翰林進學凡賜給悉如例仍命學士王直訓督

士奇榮時加考校務臻實效 己酉 上謂行在吏

部尚書郭璉等曰在外庶官亦必有文學可取者朕

欲得其人用之卿其為朕選擇以來明日璉引六十

八人入奏 上命少傅楊士奇楊榮出題試于廷中

擇其優者知縣孔友諒進士胡端禎廖莊宋璉教諭

黃純徐惟超訓導姜升七人以聞令吏部改進士為

庶吉士與知縣教諭俱歷事六科以備用

宣德九年三月戊寅朔 皇太子初受朝于文華殿

文武百官具朝服行八拜禮是日天宇澄清景象明

麗群臣仰瞻懽喜踊躍命賜鈔有差 癸未陛行在



翰林院編修陳詢為本院修撰國子監助教王仙為翰林檢討仍理助教事

七月丙子朔 壬寅以九載考最陞行在翰林院編修習嘉言為本院修撰

八月乙巳朔 丁巳陞行在太常寺卿兼翰林學士楊溥為行在禮部尚書仍兼學士 癸酉命行在翰林院修撰馬愉陳詢林震曹鼎編修林文龔錡鍾復趙恢大理寺左評事張益同庶吉士薩琦何瑄鄧建江淵李紹姜洪徐瑄林補賴世隆潘洪尹昌黃贊方熙許南傑吳節葉錫王玉劉實虞瑛趙智陳金玉振

遠端黃回祖傳綱蕭鎡陳惠陳睿三十七人於文淵閣進學先是 上命翰林院簡進士薩琦等於文淵閣進學至是并愉等召入左順門試之 上親第高下賜賚有差少詹事兼侍讀學士王直有訓勵勞賜鈔一千貫

九月乙亥朔 庚辰 上將率師巡邊命少師蹇義少傅楊士奇楊榮禮部尚書胡濙楊溥工部尚書吳中等扈從 壬午少保戶部尚書兼武英殿大學士黃淮陞辭賜御製詩及鈔二千貫

十月甲辰朔 丁卯陞南京國子監司業陳敬宗為



本監祭酒北京國子監助教劉球為行在翰林院檢討仍理助教事

十一月甲戌朔 庚子戶部尚書兼謹身殿大學士致仕陳山卒山福建沙縣人初由教官被薦陞吏科給事中侍 上講讀 上為皇太子陞左春坊左庶子 上正大統陞戶部左侍郎遂陞戶部尚書兼謹身殿大學士自陳老疾命致仕未抵家卒年七十山為人寡學急利而昧大體高煦反 上親征之既還師山迎奏請乘勝掩襲趙王執之 上曰趙王何罪而執不聽自是遂薄山其歸也恩禮一無所及

宣德十年正月癸酉朔 乙亥

宣宗皇帝崩 時初三日 壬午

英宗皇帝即位 時初十日 戊戌北京國子監祭酒

貝泰奏將監生所作課業做書按季送翰林院考較年終奏繳文冊數目從之

三月癸酉朔 庚辰陞行在翰林修撰劉翀為山西按察司僉事改行在工部主事王一寧為行在翰林院修撰仍支正六品俸行在禮科給事中朱應康振俱為行在翰林院檢討

五月壬申朔 己亥陞行在翰林院待詔趙琬為北



京國子監司業

七月庚午朔行在禮部以應天鄉試奏請考官 上命行在左春坊左庶子兼侍讀周述侍讀苗衷為之丙子纂修 宣廟實錄以太師英國公張輔為監修少傅兵部尚書兼華蓋殿大學士楊士奇少傅工部尚書兼謹身殿大學士楊榮禮部尚書兼翰林學士楊溥少詹事兼翰林侍讀學士王英少詹事兼侍講學士王直為總裁 戊寅陞行在翰林院修撰金問為太常寺少卿兼侍讀學士 八月庚子朔 癸卯命侍讀學士李時勉侍講高穀

為順天鄉試考官宴于本府 庚申擢翰林院庶吉

士蕭鎡林補賴世隆吳節徐理薩琦江淵為編修王

王李詔姜洪何瑄王振為檢討

十月己亥朔 壬子召太常寺少卿魏驥行在翰林院修撰王鈺檢討陳璉赴行在從尚書胡濙奏請為明年會試同考官也

十一月戊辰朔 丙申陞行在翰林院編修梁禔為本院修撰

十二月戊戌朔 壬寅命大學士楊士奇楊榮學士楊溥輪議建言事件從尚書胡濙請也



正統元年二月丁酉朔 癸卯 命少詹事兼侍讀  
學士王直侍講學士陳循為禮部會試考官賜宴于  
禮部 丙辰行在禮部尚書胡濙等進經筵儀注先  
是少傅兵部尚書兼華蓋殿大學士楊士奇少傅工  
部尚書兼謹身殿大學士楊榮禮部尚書兼翰林院  
學士楊溥言 上命太師英國公張輔等推舉講讀  
官以聞 上賜勅諭以輔知經筵事士奇榮溥同知  
經筵事少詹事兼侍讀學士王直少詹事兼侍講學  
士王英侍讀學士李時勉錢習禮侍講學士陳循侍  
讀苗秉侍講高穀修撰馬愉曹鼎兼經筵官翰林春

坊等衙門儒臣分直侍講每日止用講讀官四員學  
士輪流侍班不用侍衛侍儀執事等官侍班講讀等  
官入見行叩頭禮東西分立先讀書次讀經或讀史  
每伴讀十數遍後講官直說大義惟在明白易曉講  
讀後侍書官侍 上習書畢各官叩頭退 行在禮  
部尚書胡濙奏三月初一日殿試貢士 上命少傅  
兵部尚書華蓋殿大學士楊士奇少傅楊榮少保行  
在工部尚書吳中行在吏部尚書郭璉禮部尚書兼  
翰林學士楊溥行在兵部尚書王驥行在刑部尚書  
魏源行在都察院右副御史顧佐行在戶部右侍郎



吳璽少詹事兼翰林侍讀學士王英行在大理寺右少卿程富行在翰林侍讀學士李時勉錢習禮為讀卷官餘執事如例

三月戊辰朔 殿試會試舉人劉定之等一百人

戊寅擢第一甲進士周旋為翰林院修撰陳文劉定之為編修賜羊酒宴於本院選進士王鑑劉鉞余汴王尚文伊徂李震王忠王偉徐珪秦瑛古鏞顧睢雷復為庶吉士於本院讀書 上命少詹事兼侍讀學士王直少詹事兼侍講學士王英教習文章

五月丙寅朔陞右春坊右庶子沈粲為大理寺右少

卿仍於文華殿書辦以九年任滿故也 壬辰每處

添設按察司官一員南北直隸御史各一員專一提

調學校至是兩浙鹽運司同知胡軫為副使廣西蔚

林縣知縣劉虬監察御史薛瑄高超工部郎中高志

吏部主事歐陽哲修撰王鈺編修彭珣檢討陳遂國

子監學正莊觀俱為僉事湖廣布政司檢校程富福

建建寧府教授彭勗為監察御史分行提調軫浙江

虬湖廣瑄山東超福建富北直隸勗南直隸陞辭賜

勅諭之

六月丙申朔 庚子行在翰林院侍讀學士李時勉



言本院檢討李錫及辦事大理寺副馬信俱有疾  
上令回籍調治 乙巳作公生門於長安左右門外  
之南

閏六月乙丑朔 戊子陛行在吏科給事中儲懋為  
行在翰林修撰先是懋以舉充經筵講官至是九年  
考稱故有是命

七月甲午朔 庚申擢訓導陳贄沈慶為行在翰林  
院待詔於內府授小內使書

十月癸亥朔 丙寅禮部尚書兼華蓋殿大學士張  
瑛卒瑛字子玉順德府邢臺人洪武丙子由鄉貢士

授陝西寧州訓導調武德衛再調宿遷縣永樂戊子  
秩滿九載特擢吏科給事中 宣宗皇帝時為皇太  
孫始親學遴選儒臣俾司伴讀瑛與焉 仁宗皇帝  
踐祚陞春坊中允未幾陞諭德尋改洗馬 宣宗皇  
帝繼統之初錄瑛舊勞陞行在禮部右侍郎宣德改  
元遷左侍郎兼華蓋殿大學士入典內閣機務丁未  
陞尚書仍兼職預修 太宗 仁宗皇帝實錄為總  
裁官既而調南京禮部甲寅丁外艱詔起復之 賜  
御製詩十餘軸楮萬緡至是卒年六十二遣官祭葬  
正統二年四月庚申朔 辛酉郟王冠告 太廟命



太師英國公張輔持節行冠禮少傅兵部尚書謹身  
殿大學士楊榮為贊行在禮部尚書胡濙宣勅戒行  
在禮部左侍郎章敞行在鴻臚寺卿楊善導引并啓  
王行禮

十月丁巳朔 壬戌左春坊左庶子兼翰林院侍讀  
周述卒述江西吉水人永樂曾祭榜進士述第二從  
弟子孟簡第三 御批云兄弟齊名古今罕比士林榮  
之

正統三年正月丙戌朔 丁未右春坊右諭德黎恬  
卒恬江西清江人以進士擢監察御史為交趾靈州

知州內閣儒臣交薦其文學陞今官

四月甲寅朔 丙寅以 宣宗皇帝實錄成賜監修  
官太師英國公張輔總裁官少傅楊士奇楊榮禮部  
尚書兼翰林學士楊溥副總裁兼纂修官少詹事兼  
翰林侍讀學士王直少詹事兼翰林侍講學士王英  
白金一百兩綵幣六表裏羅衣一襲鞍馬一副纂修  
官侍讀學士李時勉錢習禮洗馬蘭從善侍讀苗衷  
曾鶴齡馬愉侍講高穀胡種邢寬修撰周叙尹鳳岐  
孫曰恭習嘉言陳叔剛陳詢曹鼎儀銘王一寧杜寧  
儲懋編修楊翥董璘楊壽夫林文鍾復主事劉球劉



鉉洪璵評事張益白金各四十兩綵幣三表裏羅衣  
一龍稽考叅對并催纂官編修蕭鎡賴世隆吳節檢  
討李紹姜洪何瑄主事潘勤正字沈寅白金各二十  
五兩綵幣二表裏羅衣一龍騰錄正副本郎中等官  
黃美良正等十一員白金各二十兩綵幣二表裏羅衣  
一龍騰彙修撰等官黃裳等九員白金各十五兩綵  
幣一表裏羅衣一龍收掌文籍修撰等官胡讓等三  
員白金各十兩綵幣一表裏羅衣一龍騰寫正副本  
冠帶秀才陳學等十八名白金各十兩綵幣一表裏  
纂修官侍講學士陳循白金三十兩綵幣三表裏御

史邵宏譽白金二十兩綵幣一表裏羅衣一龍稽考  
叅封等官王王白金十五兩綵幣二表裏徐理白金  
十兩綵幣一表裏以循等憂制宏譽久病故也 辛  
未以 宣廟實錄成陞總裁官少傅兼兵部尚書華  
盖殿大學士楊士奇少傅工部尚書兼謹身殿大學  
士楊榮俱為少師兼職如故禮部尚書兼翰林院學  
士楊溥為少保兼禮部尚書武英殿大學士總裁兼  
纂修官少詹事兼翰林學士王直少詹事兼侍講學  
士王英俱為禮部左侍郎兼職如故纂修官侍讀學  
士李時勉錢習禮為洗馬蘭從善俱為學士侍讀苗



食陽漫錄卷之三十一  
三十一  
裏侍讀學士侍讀曾鶴齡馬愉侍講高穀俱為侍講  
學士修撰周叙尹鳳岐孫曰恭習嘉言陳叔剛陳詢  
俱為侍讀曹鼎儀銘王一寧杜寧儲懋俱為侍講編  
修楊翥董璘楊壽夫林文鍾復評事張益監察御史  
邵宏譽俱為修撰改主事劉球劉鉉洪璵俱為翰林  
院侍講陞從五品俸侍講胡種邢寬及稽考叅對催  
纂謄錄收掌文籍官編修蕭鎡等三十一員俱陞俸  
一級擢謄錄冠帶秀才監生生員陳學等十八名俱  
為試中書舍人

六月癸丑朔 甲子行在翰林院學士李時勉奏臣

備官侍從三十餘年未獲歸展棄梓比來妻子相繼  
淪亡一門之內孤苦煢煢情迫于裏屬以史氏方嚴  
不敢言私今史已完乞賜一歸 上憫其情從之  
七月癸未朔 丙戌命翰林學士錢習禮侍讀陳詢  
為應天鄉試考官

八月癸丑朔 乙卯命行在翰林院學士曾鶴齡侍  
講洪璵為順天府鄉試考官賜宴本府 乙巳陞翰  
林院修撰陳用為侍講

十一月辛巳朔 戊戌陞行在翰林院侍講洪璵為  
吏部右侍郎



正統四年庚戌朔 丙戌 命行在禮部左侍郎兼

翰林侍讀學士王直行在翰林院學士藺從善為會

試考官賜宴于禮部 己未少師兵部尚書兼華蓋

殿大學士楊士奇疏陳老疾乞致仕 上賜勅諭之

曰朕仰惟 祖宗付託之重念天下蒼生屬望之深

尚賴舊人勉圖寧永卿歷事 列聖位進師臣純誠

碩德委著於時嘉謨讜論卓有成績宜致匪躬用弘

匡濟升于大猷乃以老疾遂乞致仕夫止足之分固

士君子所尚而寅亮之職惟老成人可居載覽奏章

良切于懷茲特命還鄉展墓仍來供職卿其體朕心

以國家為心毋久留鄉土朕延佇以望遂遣中官護

歸賜賚甚厚 乙亥行在禮部引會試中式舉人楊

昂等一百人陞見

閏二月己卯朔 戊申行在禮部尚書胡濙奏三月

初二日殿試貢士合請執事官 上命少師工部尚

書兼謹身殿大學士楊榮少保禮部尚書兼武英殿

大學士楊溥少保兼工部尚書吳中行在吏部尚書

郭璉行在戶部尚書劉中敷行在兵部尚書兼大理

寺卿王驥行在刑部尚書魏源行在都察院右都御

史陳智行在禮部左侍郎兼翰林侍講學士王英行



在大理寺左少卿程富行在翰林學士錢習禮行在  
通政使司左叅議虞祥為讀卷官

三月巳酉朔 戊子擢第一甲進士施槃為行在翰  
林院修撰楊鼎倪謙為編修

十月丙子朔 行在工部右侍郎羅汝敬致仕汝敬  
江西吉水人永樂甲申進士選翰林庶吉士 太宗  
注意作養忽召汝敬背誦古文不能稱旨遂謫戍江  
南即日遣出城越數日召回釋之汝敬自是奮力進  
學尋擢修撰九年滿陞侍講又左遷御史 宣廟登  
極交趾黎利弗靖陞汝敬工部侍郎齋書往諭之汝

敬文學才翰皆有可稱侍郎于謙嘗戲汝敬閉於空  
室令作詩三十韻放之汝敬援筆頃刻而就人服其  
敏云

正統五年二月甲戌朔 乙亥 命翰林院侍講學

士馬愉侍講曹鼎文淵閣辦事 乙酉命行在禮部

左侍郎兼翰林院侍讀學士王直理部事 丙戌少

師工部尚書兼謹身殿大學士楊榮乞還鄉祭掃先

塋 上從之且諭榮曰卿為國老成人不可一日去

朕左右但致孝於其先此人子不自己之心而朕素  
所嘉尚故勉徇所請畢事其即還朝毋緩



五月壬寅朔 甲辰命行在兵部左侍郎鄭辰都察院右僉都御史丁璿翰林院侍講學士曾鶴齡編修董璘清理武臣貼黃 丁卯翰林院修撰施槃卒年二十三從大學士楊溥為師為古文其志甚勤至是疾卒士大夫惜之

六月辛未朔 乙亥復除行在翰林院侍講學士陳循仍舊職以母喪服闋也 戊寅命右春坊右中允吳餘慶署掌左右二春坊事

七月辛丑朔 壬寅少師工部尚書兼謹身殿大學士楊榮卒榮字勉仁福建建安人初名子榮由進士

入翰林院為編修 太宗文皇帝為更名初建內閣簡翰林之臣七人專典密務且兼稽古纂述之事榮與馬旦夕承顧問歷進官修撰侍講諭德侍 皇太子講讀嘗命往甘肅視師規畫稱旨陞右庶子侍講如故其巡邊扈從等事多不能載受詔修五經四書性理大全預總裁書成陞翰林學士仍兼庶子陞文淵閣大學士兼翰林學士 太宗不豫受遺命 仁宗即位陞太常寺卿兼職尋陞太子少傅兼謹身殿大學士賜以銀章文曰繩愆糾繆且諭榮曰朕有過舉卿即奏來以此識之又陞兼工部尚書三俸俱支



宣宗即位進少傅再進少師立朝凡四十年考京闈鄉試者一廷試讀卷者九修四朝實錄皆與總裁累朝春遇錫賚之隆元勳世戚不及也是歲春乞歸祭掃上命中官偕往欲其速來還至杭州得疾卒年七十贈光祿大夫左柱國太師謚文敏又命中官護喪歸敕有司營葬事仍官其子恭為尚寶司丞丁卯廣東右布政使劉永清自陳老疾乞致仕從之永清湖廣石首人由進士歷官行在翰林檢討修撰侍講正統初陞布政使十月庚午朔乙未陞翰林侍講儀銘為郕府左長

史修撰楊翥為右長史

十二月己巳朔乙酉陞右春坊右中允吳餘慶為通政司右叅議仍管寫武職誥命

正統六年二月戊辰朔丁亥少保禮部尚書兼武英殿大學士楊溥奏乞歸省先塋上從之命馳傳以往遣中官護送

三月戊戌朔戊午翰林侍講學士曾鶴齡卒鶴齡字延年江西泰和人永樂辛丑進士第一擢為翰林修撰庚子秩滿陞侍讀正統戊午陞侍講學士甲子命行在翰林編修江淵賴世隆檢討何瑄李紹復



任先是淵等以剝員待次于家至是少師兵部尚書  
華蓋殿大學士楊士奇等言本院闕官故召用之

五月丙申朔 戊申賜行在禮部左侍郎兼翰林侍  
讀學士王直行在禮部左侍郎兼翰林侍講學士王  
英誥命封贈其二代文職非九載任滿不得給誥勅  
直英方歷任三載上疏請給 上念其文學老臣特  
賜之 甲寅賜行在翰林侍讀學士苗衷侍講學士  
馬愉誥命并封其父母衷愉三年考滿以例未應給  
誥上章請給 上念儒臣特賜之愉又言臣母劉繼  
母張先受勅封而故繼母魏以例拘不獲褒典 上

命并封之

六月丙寅朔 丙戌行在國子監祭酒貝泰致仕泰  
金華人由鄉貢任教諭進國子助教陞司業以大臣  
薦陞祭酒善教

七月乙未朔 巳酉命行在翰林侍講學士陳循往  
同翰林侍講陳用為應天鄉試考官 癸亥復故少  
師工部尚書兼謹身殿大學士楊榮家從其子尚寶  
司丞恭奏請也

八月乙丑朔 丁卯遣行在翰林學士苗衷釋奠孔  
子 戊子命行在翰林侍講劉鉉復任先是鉉告病



家居至是病愈故有是命

十一月甲午朔 上御奉天殿頒詔天下建奉天華蓋謹身三殿乾清坤寧二宮始成 改給兩京文武衙門印先是北京諸衙門皆冠以行在字至是以宮殿成始去之而於南京諸衙門增南京二字遂悉改其印

閏十一月甲子朔 丙子陞翰林學士李時勉為國子監祭酒時祭酒員缺吏部舉時勉歷練年深學行俱優故有是命

正統七年正月癸亥朔 戊子禮部左侍郎兼翰林

侍講學士王英上章乞歸老 上嘉重儒臣特留之

二月壬辰朔 戊戌命禮部左侍郎兼翰林侍講學

士王英翰林侍讀學士苗衷為會試考官 甲辰翰

林學士蘭從善以年老疏乞致仕 上以儒臣須用

老成人仍令蒞事

三月壬戌朔 甲戌禮部奏請殿試執事等官 上

命少師楊士奇少保楊溥吏部尚書郭璉戶部尚書

王佐刑部尚書魏源都察院右都御史王文兵部左

侍郎鄺埜工部左侍郎王蚤大理寺左少卿薛瑄通

政司右通政李錫侍講學士高穀馬愉侍講曹鳳為



讀卷官 丙子策試舉人姚夔等一百五十一人

甲申擢第一甲進士劉儼為翰林修撰呂原黃諫俱編修

八月戊子朔 癸丑賜少師楊士奇少保楊溥誥命并封贈其三代及妻近制京官九年考滿始給誥命推封 上以二人輔相元老特有是命士奇又自陳臣蒙 先朝贈臣祖公榮為少傅祖母胡氏為夫人恩至渥也但念臣父子將寔伯祖公辰伯祖母嚴氏所出繼公榮後今公辰嗣絕臣兼承其祀伏見前代人臣多得乞封旁親 國朝惟有封贈親生祖父母

之制無及旁親之令今公辰雖於臣稱為伯祖母寔臣親祖父母非其餘旁親之比伏望 聖仁不循常例停臣本身及妻即今所得誥命移贈伯祖公辰伯祖母嚴氏俾得沾恩光顯無窮不勝惓惓祈恩之至上命并予之

十一月丁巳朔 壬戌建刑部都察院大理寺於宣武街西詹事府于玉河東隄 己巳泰和縣民奏少師楊士奇子稷豪橫不法百餘事詞所連者幾千人事下都察院士奇自陳稷冥頑不肖并已失教狀且以所連者衆乞令法司量逮之上命執稷并連重者



三百餘人至京其餘巡按御史等官收驗以聞  
正統八年正月丁巳朔 巳巳調太常寺少卿兼翰  
林侍講學士金問於南京太常寺 庚午陞禮部左  
侍郎兼翰林侍讀學士王直為吏部尚書調吏部左  
侍郎魏驥於禮部 命禮部左侍郎兼翰林侍講學  
士王英理本部事

二月丁亥朔遣祭酒李時勉釋奠先師孔子 壬辰  
命吏部尚書王直禮部左侍郎兼侍講學士王英仍  
侍經筵講書

四月丙戌朔 巳丑國子監祭酒李時勉以年至七

十乞致仕 上以時勉學行淳正為諸生矜式不允  
其去 庚寅翰林學士藺從善以年老乞致仕從之  
丁酉都察院右都御史王文等劾奏少師兵部尚書  
兼華蓋殿大學士楊士奇縱其子稷為惡宜黜之  
上曰士奇 先帝舊臣日夕輔導朝廷焉知其子居  
鄉為惡命守官如故翌日六科十三道又交章劾之  
上置不問

六月甲申朔 丁亥翰林侍講劉球下獄死球以雷  
震奉天殿鷓鴣吻上十事五府六部集議咸言球所言  
惟擇太常寺官當從之請令吏部推舉翰林修撰董



璘聞之遽自乞為太常寺官球坐璘累下獄數日錦  
衣指揮馬順以球病死聞碎其尸棄之順承中官王  
振意也球字廷振江西安福人永樂辛丑進士擢禮  
部主事正統初改侍講正統己巳贈學士謚忠愍二  
子鉞鈺皆進士鈺浙江提學副使 甲辰下大理寺  
左少卿薛瑄于獄初太監王振恨瑄不加禮會有冤  
獄瑄駁之振嗾御史劾瑄故出人死罪罪當死賴大  
臣疏救得免歸

七月甲寅朔 戊午國子監祭酒李時勉坐伐文廟  
樹枷于監門監生李貴等千餘人詣闕訴時勉衰老

具言教諸生有方乞貸之有石大用者復乞代枷  
上乃釋之初王振詣監時勉不為之屈因而罪之  
丙寅翰林院學士藺從善既致仕請以其孫蕃為國  
子監生 上念其侍從歲久特許之

八月癸未朔 乙酉營建國子監遣工部尚書王邕  
祭孔子廟 丁亥釋奠先師孔子遣翰林侍講曹鼐  
行禮 己酉太子賓客國子監祭酒兼翰林侍講胡  
儼卒年八十三儼字若思江西南昌人由舉人歷華  
亭長垣教諭疏乞就近養親改餘干洪武乙卯以薦  
授桐城知縣永樂初用解縉薦召試之 太宗悅其



文遷翰林檢討尋陞侍讀直內閣甲申陞左春坊左  
諭德仍兼侍讀未幾陞國子祭酒庚寅車駕北征命  
以祭酒兼侍讀掌翰林事輔導 皇太孫監國洪熙  
改元春以疾辭加授太子賓客致仕宣德初召至京  
欲留用之儼復以疾辭歸至是卒

九月壬子朔 乙卯翰林學士錢習禮自陳年踰七  
十乞歸 上以習禮文學老臣不允所請

十一月壬子朔命翰林修撰許彬復任親喪服闋也  
正統九年正月辛亥朔 壬戌以大祀禮成 上御  
奉天殿大宴文武群臣及四夷朝使特命翰林侍講

曹鼐升殿班列學士之下 乙丑陞翰林侍講曹鼐  
為本院學士先是鼐入內閣參與機務至是陞之鼐  
具疏辭 上不從

二月辛巳朔 丙戌書諭少師兵部尚書華蓋殿大  
學士楊士奇曰卿歷事我 祖宗嘉謨嘉猷寔惟簡  
在暨朕嗣承大統卿以老成碩德啓沃問學弼贊政  
化裨益尤多比卿以疾違朕左右者數月未有勿藥  
之喜朕心夙夜不忘書曰天壽平格知卿之福壽宜  
未艾也茲特遣內臣往視并賜願養之資復惟卿之  
子有違家訓上干國紀重以祖宗之法拘繫之卿其



以理自處勉進藥食早圖康復用副朕注望之意

三月辛亥朔 甲子少師兵部尚書兼華蓋殿大學

士楊士奇卒士奇名寓以字行江西泰和人少孤感

奮力學洪武中為邑庠弟子師以事亡入武昌有司

薦其能文徵入翰林考為優等授王府審理仍供職

翰林 太宗即位擢為編修命與解縉等七人入內

閣典稅務陞侍講 仁宗為皇太子以本官兼左春

坊左中允尋陞左春坊左諭德兼侍講 太宗幸北

京 皇太子監國命蹇義并士奇等四人輔導車駕

回南京問士奇曰爾輔東宮久所行果如何士奇以

孝敬對又歷舉其事實 太宗上賓凡喪儀治體皆

士奇等議行踰二十七日尚書呂震欲易吉服士奇

不可明旦 仁宗素冠衰經出視朝謂左右大臣曰

梓宮在殯吾豈忍易士奇所執是也未幾進禮部侍

郎兼華蓋殿大學士尋陞少保既又陞少傅天下朝

覲官至尚書李應奏令其養馬士奇執不可乃止洪

熙改元進兼兵部尚書辭不得命乃辭兼俸 仁宗

允之顧蹇義曰廉潔之風士奇有焉 宣宗即位漢

王高煦反 車駕親征罪人既得有言趙王通情亦

宜往正其罪士奇以未有顛迹力爭比還京師命士



竒草詔并群言封示趙王王涕泣感恩 宣宗謂士  
竒曰趙王得以保全者卿之力也間問民隱士竒歷  
歷盡言又言古人罰不及嗣今極刑之家子弟雖賢  
例不許進用 宣宗命即除其例一日又諭士竒曰  
毋后為朕言 先帝在青宮時惟卿正言不避忤意  
先帝能從以不敗事又謂朕曰凡正直之言爾不可  
以為忤意而不從士竒對曰此 皇太后盛德之言  
也願 陛下念之暨 上即位凡寬恤事宜多從所  
言士竒請開經筵遂命同知經筵事進陞少師光祿  
大夫柱國有所建白多見施行至是卒贈特進光祿

大夫左柱國太師謚文貞勅有司祭葬錄其子彙為  
尚寶司丞

四月庚辰朔 丙戌命翰林學士陳循內閣辦事

癸卯以天旱遣翰林侍讀周叙習嘉言編修薩琦呂  
原倪謙中書舍人李廷脩張傑分祭岳鎮海瀆鍾山  
之神

七月戊申朔 丁卯少保禮部尚書兼武英殿大學  
士楊溥自陳臣歷事列聖叨居顯秩今年踰七十筋  
力衰耗雖欲勉圖報稱而力不從心伏乞允臣休致  
上曰卿輔相老臣朕所倚毗而優禮者其視事如故



母更求去

八月丁未朔釋奠先師孔子遣翰林學士陳循行禮  
九月丙子朔命南京國子監祭酒陳敬宗復任敬宗  
九年秩滿至京以衰邁請致仕吏部覆奏上曰敬  
宗學行老成正宜模範後學未可以去其令復任  
戊戌少師楊士奇男穆死錦衣衛獄中穆挾父勢搆  
他人墓葬已祖多養無賴子為奴強奪婚姻家田地  
子女擅抽分商貨屢殺同鄉無罪人為怨家所訴也  
十月丙午朔丁未建永樂十年進士題名碑於南  
京國子監初太宗皇帝既策進士畢巡幸北京故

碑未建及是祭酒陳敬宗以為言上從之命翰林

侍講學士王英撰文勒石甲戌命翰林侍講劉鉉

檢討王王清理軍職貼黃

十二月乙巳朔壬子陞南京太常寺少卿兼翰林  
侍讀學士金問為南京禮部右侍郎

正統十年二月乙巳朔丁未釋奠先師孔子命翰

林侍講學士馬愉行禮辛亥命翰林學士錢習禮

侍講學士馬愉為會試考官賜宴于禮部

三月甲戌朔乙酉禮部尚書胡濙奏三月十五日

殿試舉人請執事官上命武英殿大學士楊溥吏



部尚書王直兵部尚書徐晞刑部尚書金濂工部尚書王𩇛右都御史王文戶部左侍郎李暹通政使李錫大理寺卿俞士悅翰林學士陳循曹鼐侍讀學士苗衷為讀卷官 己亥擢第一甲進士商輅為翰林修撰周洪謨劉俊俱為編修

四月甲辰朔 乙丑陞國子監司業趙琬為左春坊左諭德仍管司業事助教李洪孔鐸翁瑛俱為翰林檢討仍管助教事俱九年考稱

五月甲戌朔禮部言天下諸司官吏軍民建言例會廷臣議行竊見宣德中尚書蹇義夏原吉已解職務

特詔與議正統初學士楊士奇楊榮楊溥輪番會議今士奇榮已故惟溥尚在請令學士陳循曹鼐馬愉叅之 上以溥年老禮宜優閒令循等與議

六月癸卯朔遣禮部左侍郎兼翰林侍講學士王英祭南鎮會稽山之神 丙寅命翰林侍講杜寧復職

服闋 陞南京國子監丞諸質為編修仍理監事 八月壬寅朔 乙丑陞翰林檢討姜洪為本院脩撰以九載秩滿故也

十月辛丑朔 丁巳陞翰林學士錢習禮為禮部右侍郎侍讀儲懋為戶部右侍郎 辛酉陞翰林編修



謝璉為侍講以九載考最故也 戊辰陞翰林學士  
曹鼐為吏部左侍郎陳循為戶部右侍郎侍講學士  
馬愉為禮部右侍郎侍讀學士苗衷為兵部右侍郎  
侍講學士高穀為工部右侍郎仍兼舊職命衷穀同  
鼐等內閣辦事

十二月庚子朔 庚申陞翰林編修蕭鎡為本院侍  
讀吳節為侍講俱九載考最

正統十一年正月己巳朔 己丑命翰林檢討錢溥  
復任以丁憂服闋也

二月己亥朔 丁未釋奠先師孔子遣吏部左侍郎

兼翰林學士曹鼐行禮

辛酉翰林學士蘭從善卒從善河南彰德府磁州人  
永樂初由教職選侍 皇太孫宣德初與脩 兩朝

實錄陞洗馬正統初與脩 宣廟實錄陞學士

三月戊辰朔禮部右侍郎兼翰林侍講學士馬愉奏  
父士賢老疾乞賜歸省 上許之命有司給驛馬廩

饑并家人脚力口糧

四月戊戌朔 丁卯翰林侍讀周叙奉命祭衡山事  
竣過家鄉人與其子蒙有隙訴叙枉道叙自陳所經  
實便且近都察院仍請下叙獄 上特宥之



五月戊辰朔 甲戌國子監祭酒李時勉上疏言臣  
草茅賤質樗散微材十六而遊泮庠從師講學三十  
而登進士釋褐彰纓選入翰林首被 文皇之隆眷  
使居秘閣縱觀先聖之遺書既十年而擢屬秋官又  
二載而召預史事自茲七命膺祿秩之益崇歷事三  
朝沐恩榮之愈厚叨荷 聖皇之寵顧除臣掌教之  
清班受職蒞官所當竭力反躬度德實匪其才譬猶  
下乘之駑駘空費上槽之菽粟况今臣行年七十之  
上而疾病交侵居官三紀之餘而涓埃莫報昨者敷  
陳愚悃懇乞歸田 皇上垂念老臣未賜俞允而老

臣亦戀 明主敢遂閒安第以枯朽之資不堪委任  
之重昔也徒持文墨議論曾何益於朝廷今焉幸當  
教育賢才期有裨於聖化瞻依日月感會風雲正宜  
堅葵藿之誠心可惜迫桑榆之暮景形骸潦倒精力  
衰頹尋常於庶務之施行或記一而忘十朝夕於諸  
生之訓誨每語後而遺前言則氣不續聲行則筋不  
束骨臨政多怠慮事不詳雖使整犬馬之微勞終莫  
報乾坤之大德徒有妨於賢路竟無補於明時伏望  
聖慈特垂優命俾臣得以棲身畎畝全三尺之微軀  
長當擊壤康衢祝萬年之聖壽 上覽奏嘉歎久之



仍不允其去

七月丁卯朔 庚辰少保禮部尚書兼武英殿大學士楊溥卒溥字弘濟湖廣石首人洪武庚辰進士除翰林編修永樂初 太宗擇東宮官授司經局洗馬兼編修 皇太子問漢廷尉張釋之不易得溥曰釋之誠不易得然世豈無其人但無文帝寬厚仁恕之君用之耳 臣以為釋之在漢一時不易得若文帝三代而下不易得也退採文帝事關治道者編為事實以進後坐事繫獄十年 仁宗即位釋之擢行在翰林學士尋陞太常寺卿兼學士未幾詔開弘文館

於思善門之左簡文學之士五人日直其中職討論溥為首親握印章授之曰朕用卿等於左右非止助益學問亦欲廣知民事卿等有所建白用此封識以進 宣宗嗣位修兩朝實錄為總裁官丁內艱奪哀復任陞禮部尚書兼學士 上即位修 宣廟實錄復為總裁官同知經筵事陞少保禮部尚書兼武英殿大學士卒贈太師謚文定遣官祭葬官其孫壽為尚寶司丞溥在內閣與士奇榮皆楊姓時號三楊三人者各有所長士奇有學行榮有才識溥有雅操天下引領望治焉溥尤謙恭小心趨朝循墻而走儒之



淳謹者也

八月丙申朔 丁酉釋奠先師孔子遣戶部右侍郎  
兼翰林學士陳循行禮 癸卯禮部左侍郎兼翰林  
侍講學士王英以年老乞致仕 上念其精力未衰  
留之 庚申吏部尚書王直右侍郎趙新曹義掌光  
祿寺事戶部左侍郎柰亨等下獄以相訐奏為給事  
中監察御史所劾也 辛酉命禮部右侍郎錢習禮  
署吏部事

九月丙寅朔 庚午命署吏部錢習禮仍任禮部事  
以吏部尚書王直等復職也 丙戌復除翰林編修

陳文以丁憂服闋故也

十一月乙丑朔 癸巳陞翰林侍讀周叙為南京翰

林侍講學士

十二月甲午朔 癸卯命故少師楊士奇男秣充國  
子監生

正統十二年正月甲子朔 壬辰禮部左侍郎兼翰

林侍講學士王英九年任滿上命復職

二月癸巳朔 戊戌陞翰林侍讀陳詢為本院侍講  
學士以九載秩滿也 復除翰林編修黃諫以丁憂  
服闋也 甲寅 上御奉天門早朝退諭禮部尚書



胡濙等曰朝廷人材須要作養方獲實用今命翰林侍講等官杜寧裴綸劉儼商輅江淵陳文揚晁呂原劉俊王玉每日俱在東閣進學作文仍命學士曹鼐陳循馬愉嚴督考試務期成效凡會講時輪流經筵侍班治事

三月癸亥朔 癸未國子監祭酒李時勉致仕時勉在國子監六年餘諸生服其教而成者甚多先是累求去不遂及是以中貴用事不能諂事求去益切既得命即就道朝臣及國子生出餞都門外者幾三千人 陞翰林侍讀蕭鎡為國子祭酒

四月壬辰朔 乙卯吏部言尚寶司丞楊壽故少保禮部尚書兼武英殿大學士溥之孫今以謝恩來京例應承重守制 上念溥有舊勞特留壽命翰林讀書 戊午陞翰林編修徐瑄為本院侍講檢討王振為修撰俱九年任滿也

閏四月壬戌朔 癸未改翰林檢討金達為禮科給事中達故兵部尚書忠之子先是以蔭檢討回原籍儒學依親讀書至是又自陳年已長成乞在京衙門辦事故改用之

五月辛卯朔 壬辰命翰林侍講邢寬復任寬先以



剩負家居至是陳言民情數事 上命吏部召至故  
有是命 丁巳陞翰林院檢討王王為本院修撰南  
京國子監助教孫士用為檢討仍理助教事以九載  
任滿也

六月辛酉朔 丁卯禮部右侍郎錢習禮復乞致仕  
從之時中貴用事達官多拜謁其門習禮耻為之屈  
故以老疾辭歸物議高之

七月辛卯朔 己亥命翰林院侍講王一寧檢討錢  
溥為應天府鄉試考官

八月庚申朔 丁卯釋奠先師孔子遣國子監祭酒

蕭鎡行禮 命翰林侍讀習嘉言侍講邢寬為順天  
府鄉試考官賜宴于本府

九月庚寅朔 乙未禮部右侍郎兼翰林侍講學士  
馬愉卒愉字性和山東臨朐縣人宣德丁未進士第  
一擢翰林院修撰 上嗣位初愉侍經筵尋陞侍讀  
宣宗實錄成陞侍讀學士正統五年奉詔入閣典機  
務十年陞禮部右侍郎兼侍講學士晨起趨朝得疾  
仆不能語 上命醫往視越四月卒年五十三 上

深嗟悼賜棺槨賻鈔萬緡命有司歸喪營葬贈禮部  
尚書兼翰林學士舊例無贈兩官者贈兩官自愉始



愉端重簡默不設城府兩考會試盡心擇才為文章  
不務雕斲論事不苟為異同自處澹如門無私謁人  
稱篤厚長者云 丁酉 先是錦衣衛籍撫州府民  
徐翰家有逃匿者上命拷鞠見逮者言籍翰之命初  
下刑科給事中王理以告為事按察副使王裕裕與  
翰有姻潛以告其家故致逃匿遂下理等於錦衣獄  
俱論斬 上命固禁之於是禮部左侍郎兼翰林侍  
講學士王英自陳臣子裕有罪實臣駑鈍衰朽失於  
教訓所致刑部請逮英 上命宥之

十月己未朔 丙寅南京國子監祭酒陳敬宗具疏

乞休 上曰敬宗學行老成正宜帥表後學豈可釋  
去仍令視事不允所請

十一月己丑朔 辛卯賜吏部左侍郎兼翰林學士

曹鼐戶部右侍郎兼學士陳循兵部右侍郎兼侍講

學士苗衷工部右侍郎兼侍講學士高穀等誥命并

封贈其祖父母父母妻孥等進秩未久 上念其輔

導有勞故命賜誥既而鼐獨陳情乞贈前母從之

十二月戊午朔 己巳陞翰林編修江淵為本院侍

讀以九年考最也

正統十三年正月戊子朔 乙卯南京禮部右侍郎



金問卒問字公素蘇州府吳縣人永樂初以善書進  
久之授司經局正字 仁宗在東宮時喜其字有格  
法後坐累與黃淮楊溥繫獄十年 仁宗即位陞修  
撰每論時政得失皆見采納宣德乙卯進太常寺少  
卿兼侍讀學士正統癸亥調南京太常寺明年陞右  
侍郎至是卒遣官祭葬

二月丁巳朔釋奠先師孔子遣戶部右侍郎兼翰林  
學士陳循行禮 戊午翰林侍講學士陳詢先是奉  
命考應天府鄉試事畢枉道還松江為怨家所訐下  
錦衣衛鞠當運石還職 上命調湖廣安陸州知州

甲子命工部右侍郎兼翰林侍講學士高穀侍講杜  
寧為會試考官賜宴于禮部 乙巳吏部言翰林侍  
講邢寬九年任滿考稱當陞 上命復職

三月丙戌朔 丁酉禮部尚書胡澆奏殿試舉人  
上命吏部尚書王直戶部尚書王佐兵部尚書鄭埜  
刑部尚書金濂都察院右都御史陳鑑吏部左侍郎  
兼翰林學士曹鼐掌光祿寺事戶部左侍郎奈亨戶  
部右侍郎兼翰林學士陳循兵部右侍郎兼翰林侍  
讀學士苗衷通政司通政使李錫大理寺卿俞士悅  
太常寺少卿兼翰林侍書程南雲太常寺少卿黃養



正為讀卷官 癸丑擢第一甲進士彭時為翰林修撰陳鑑岳正俱編修正會試第一

四月丙辰朔 巳未復除翰林修撰周旋以病痊也  
癸酉改進士萬安等為庶吉士先是 上命吏部選進士人物俊秀貫在江北者三十人以聞尚書王直等選安及曹鼐熊瓚劉吉孫茂劉羽王勤謝環白行順李泰宋弼邢讓劉清喬毅李本李鏞王恕孫昱孟祥曹輔韓敏尹旻張斐李讚李寬華顯霍榮郭安李堅成章引見於內庭吏部左侍郎兼翰林學士曹鼐等言宜倣舊例改為庶吉士送翰林讀書給賜酒饌

房屋皂隸并筆墨紙劄燈油令本院侍讀習嘉言侍講王一寧編修趙恢提督教訓庶有成效從之

六月乙卯朔 癸酉陞翰林修撰張益為本院侍讀學士以任滿九載也

七月乙酉朔 乙巳命侍讀學士張益與經筵 庚戌翰林編修賴世隆嘗有索於本縣官不得御之遂令其子發縣官科歛諸事法司問有誣當世隆贖徒還職 上命贖既降官二等外用

八月甲寅朔 辛巳陞禮部左侍郎兼翰林侍講學士王英為南京禮部尚書翰林侍講王一寧為禮部



右侍郎

九月甲申朔 丙戌命禮部右侍郎王一寧仍充經筵講官

十一月癸未朔 丙戌翰林編修劉定之以弟寅之等與鄉人有隙相訐訴詞連定之下獄法司覈所訴多誣坐寅之徒定之失戒當贖杖還職

十二月癸丑朔 己巳陞翰林編修趙恢為本院侍講以任滿九年也

正統十四年二月壬子朔 丁巳釋奠先師孔子遣工部右侍郎兼翰林學士高穀行禮 乙亥陞翰林

編修倪謙為本院侍講復除翰林編修劉定之仍舊任以九年任滿及親喪服闋故也

五月庚辰朔 癸巳兵部右侍郎兼翰林侍讀學士苗衷以疾乞致仕不允 己亥命翰林侍讀學士張

益內閣辦事 戊申吏部左侍郎兼翰林學士曹鼐等奏本院庶吉士缺官教訓四夷館缺官提督今推

選得侍講劉鉉修撰王振堪教庶吉士讀書修撰許彬郎中潘勤堪提督四夷館官員子弟習學夷字從

之

六月己酉朔 辛亥致仕少保戶部尚書兼武英殿



大學士黃淮卒淮字宗豫浙江永嘉人洪武丁丑進士授中書舍人 太宗登位召淮訪以時政稱旨命入翰林備顧問自是日召與語或至夜賜坐榻前機密重務悉預聞之繼命居內閣掌制誥是年秋陞編修尋陞侍讀 太宗間以建儲之議詢之淮對曰立嫡以長萬世正法 太宗意遂決甲申冊立 皇太子命為左右春坊左庶子兼侍讀賜袍笏丁亥陞右春坊大學士仍兼侍讀復輔導 皇太孫戊子 駕巡狩命與尚書蹇義等四人留守庚寅駕北征適長沙盜起 皇太子命豐城侯李彬帥兵勦捕漢王疑

沮之淮曰豐城老將必能成功且兵貴神速宜亟遣以掩其不虞已而功成如淮言癸巳 駕再巡狩淮留守如故時漢王潛蓄奪嫡之志忌淮尤深日伺間隙言其過遂逮繫之 仁宗嗣位出淮遷通政使兼武英殿大學士仍領內閣事丁母憂起復陞少保戶部尚書大學士如故賜誥褒嘉 宣宗嗣位淮以多病上疏乞骸骨許之賜賚甚厚未幾父歿遣官祭葬淮來謝 恩留累月賜遊西苑許肩輿登萬壽山比辭親製詩送之給路費賜織金紗衣癸丑來賀 聖節因留為會試考官 上嗣位淮入朝寵賚加隆官



其子采為中書舍人留月餘歸至是卒年八十二訃  
聞遣官祭葬賜謚文簡 壬申陞翰林編修劉定之  
為本院侍講國子監助教羅伯初為檢討仍理助教  
事以任滿九載考稱也 復除翰林檢討何瑄李紹  
俱親喪服闋也

七月巳卯朔 巳丑虜分道刻期入寇也先寇大同  
至貓兒庄右叅將吳浩迎戰敗死脫脫不花王寇遼  
東阿剌知院寇宣府圍赤城又別遣人寇甘州諸守  
將憑城拒守報至遂議親征 壬辰皇第三子生辰  
妃萬氏出也 上命郟王祁鈺居守駙馬都尉焦敬

輔之太師英國公張輔太保成國公朱勇鎮遠侯顧  
興祖恭寧侯陳瀛恭順侯吳克中駙馬都尉石璟廣  
寧伯劉安襄城伯李珍修武伯沈榮建平伯高遠永  
順伯薛綬忠勇伯蔣信左都督梁成右都督李忠都  
督同知王敬都督僉事陳友安朶兒只戶部尚書王  
佐兵部尚書鄭埜刑部右侍郎丁鉉工部右侍郎王  
永和都察院右副都御史鄧祭通政司右通政龔全  
安左叅議欒暉太常寺少卿黃養正戴慶祖王一居  
大理寺右寺丞蕭維禎太僕寺少卿劉容鴻臚寺掌  
寺事禮部左侍郎楊善左寺丞張翔翰林學士曹鼐



等俱扈從

八月戊申朔 辛酉車駕次土木先是每夕駐蹕必預遣司設監太監吳亮相度地勢至是振以軍失利慙恚即止于土木地高無水掘井二丈餘亦不得水其南十五里有河已為虜所據絕水終日人馬饑渴虜分道自土木旁近麻峪口入守口都指揮郭懋力拒之終夜虜兵益增 壬戌車駕欲起行以虜騎繞營窺伺復止不行虜詐退王振矯命擡營行就水虜見我陣動四面衝突而來我軍遂大潰虜邀車駕北行中官惟喜寧隨行振等皆死官軍人等死傷者數

十萬太師英國公張輔泰寧侯陳瀛駙馬都尉井源平鄉伯陳懷襄城伯李珍遂安伯陳埧修武伯沈榮都督梁成王貴戶部尚書王佐兵部尚書鄭埜吏部左侍郎兼翰林學士曹鼐刑部左侍郎丁鉉工部右侍郎王永和都察院右副都御史鄧祭翰林侍讀學士張益通政司左通政龔全安太常寺少卿黃養正戴慶祖王一居太僕少卿劉容尚寶少卿凌壽給事中包良佐鮑輝中書舍人俞拱潘澄錢昂監察御史張洪黃裳魏貞夏誠申祐尹竑童存德孫慶林祥鳳郎中齊汪馮學明員外郎王律程思溫程式遠端主



事俞鑑張唐鄭瑄大理寺左寺副馬豫行人司正尹  
昌行人羅如璫欽天監夏官正劉信序班李恭石王  
等皆死焉

曹鼎字萬鍾真定府寧晉人始由鄉舉為山西代州  
教官負才不屈欲見用於時乃上疏願辭教職再就  
試為吏部駁奏遂改授江西泰和縣典史縣務冗劇  
中官往來絡驛鼎應酬不懈暇則延禮師儒講學宣  
德七年部匠赴京值大比疏乞入試許之大學士楊  
士奇嘉其有志已而果中京闈鄉試第二明年春闈  
復在高選及廷試遂為第一擢翰林修撰正統改元

上初御經筵選彙日侍講讀預修 宣德實錄書成  
進侍講五年命入文淵閣參預機務九年陞翰林學  
士十年陞吏部左侍郎仍兼學士至是死事贈榮祿  
大夫少傅吏部尚書兼文淵閣大學士謚文襄遣官  
諭祭官其子恩為大理評事 上復位加贈太傅改  
謚文忠

張益字士謙應天府江寧人舉進士選庶吉士授中  
書舍人陞左評事仍於翰林供職正統戊午陞修撰  
於內府授小內使書益能文善小楷為人平易有求  
輒應故傳播特廣十四年陞侍讀學士知制誥未幾



死事贈學士謚文僖官其子翊為序班 巳巳

皇太后詔曰邇因虜寇犯邊毒害生靈 皇帝恐禍連宗社不得已躬率六師往正其罪不意被留虜庭尚念臣民不可無主茲於皇庶子三人之中選其賢而長者正位東宮仍命郟王為輔代總國政撫安天下嗚呼國必有君而社稷為之安君必有儲而臣民有所仰布告天下咸使聞知 庚午陞戶部右侍郎兼學士陳循工部右侍郎兼學士高穀俱為本部尚書仍兼學士 召前大理寺少卿薛瑄乘傳詣京 丙子文武百官合辭請於 皇太后曰聖駕北狩

皇太子幼冲國勢危殆人心汹湧古云國有長君社稷之福請定大計以奠 宗社疏入 皇太后批荅云卿等奏國家大計合允所請其命 郟王即 皇帝位禮部具儀擇日以聞群臣奉 皇太后旨告郟王王固辭受命 令翰林修撰商輅彭時入文淵閣叅預機務從學士陳循高穀薦也輅時辭王不允 九月戊寅朔 庚辰令陞翰林侍講杜寧為南京禮部右侍郎侍讀江淵為刑部右侍郎習嘉言為太常寺少卿修撰許彬為大理寺少卿以戶部尚書兼翰林學士陳循薦舉寧等俱有文學材能老成堪任也



癸未 郟王即 皇帝位詔告天下 初六日也 甲

申陞順天府府丞夏衡為太僕寺卿中書舍人陳學  
王謙蔣宏徐瑛俱為翰林編修仍於內閣書辦 丙

申陞翰林侍講劉鉉為本院侍講學士以九年任滿  
也 辛丑陞翰林編修陳文為本院侍講檢討李紹

為本院修撰俱以九年任滿也 甲辰命監察御史  
白圭李賓夏裕并以侍講徐珵編修楊昂檢討王王

郎中謝祐陳金主事王偉姚龍給事中金達王庾知  
州陳誠汪庭訓蘇璟俱行監察御史事往直隸山東

山西河南各府縣招募民壯就彼衛所量選官旗兼  
同操練聽調策應有功之日照例陞賞事定之後仍

歸為民應授職者聽從冠帶閒住  
十月戊申朔 庚戌陞修撰裴綸為山東右布政使

丙辰擢庶吉士曹鵬霍榮喬毅為給事中 丁巳擢  
翰林庶吉士劉清為兵科給事中從侍郎江淵贊理

軍務 壬戌改大理寺右少卿許彬為太常少卿兼  
翰林待詔仍舊譯書 擢庶吉士成章為戶科給事

中 癸亥命副都御史王暹吏部侍郎曹義禮部侍  
郎儀銘工部侍郎張敏右通政欒惲大理寺丞薛瑄

太常寺少卿習嘉言鴻臚寺丞張翔太僕寺少卿俞



綱分守正陽等九門時虜已宵遁京師尚戒嚴故有是命

十一月丁丑朔 辛卯工部尚書兼翰林學士高穀乞致仕 帝曰卿老成事我先帝今國家多事卿當盡心匡輔以安宗社豈可求去所奏不允 癸巳兵部右侍郎兼翰林學士苗襄以久病乞罷不允命鑿視之 甲辰陞翰林修撰王振為大理寺丞巡撫貴州 遣翰林侍講倪謙刑科給事中司馬恂頌即位詔于朝鮮國 十二月丁未朔 戊申尊 皇太后為 上聖皇太

后 母賢妃吳氏為 皇太后封妃汪氏為 皇后 皇太子母周氏為 貴妃 辛亥大理寺右寺丞王振言臣之姓名與奸臣同乞易名恂從之 己未擢庶吉士李瓚為吏科給事中尹旻刑科給事中熊瓚孫茂王勤謝環白行順宋弼俱主事王恕曹輔俱大理寺右評事李寬行人司正 辛酉戶部尚書兼翰林學士陳循等言翰林官屬雖有額員然自永樂宣德以來徃徃額外多除皆出 上命吏部止因本院在任官九年考稱者請旨照例陞授本院之職不拘多餘已舊例今本院自講讀以至五經博士等官



俱多缺員欽惟 皇上嗣登大寶正用人之際况文學侍從之臣尤當精選以備顧問資益聖學乞勅吏部於本院見任官及庶吉士內推選陞補講讀等官員缺其五經博士及典籍侍書待詔之缺俱於教官內推舉送院考補 戊辰陞翰林修撰商輅彭時為本院侍讀擢庶吉士萬安劉吉劉翊李泰俱為本院編修邢讓李本俱為本院檢討



